


PROXECTO

orz4mentos
2011

**LEI
DE MEDIDAS FISCAIS
E ADMINISTRATIVAS**


XUNTA DE GALICIA



LEI DE MEDIDAS FISCAIS E ADMINISTRATIVAS

CONTIDO

I.	EXPOSICIÓN DE MOTIVOS	7
II.	TÍTULO I MEDIDAS FISCAIS	15
II.1.	CAPÍTULO I TRIBUTOS CEDIDOS	17
II.2.	CAPÍTULO II TRIBUTOS PROPIOS	22
II.3.	CAPÍTULO III NORMAS DE APLICACIÓN DOS TRIBUTOS	23
II.4.	CAPÍTULO IV ORGANIZACIÓN DA ADMINISTRACIÓN TRIBUTARIA	28
III.	TÍTULO II MEDIDAS ADMINISTRATIVAS	33
III.1.	CAPÍTULO I RÉXIME FINANCEIRO, ORZAMENTARIO E PATRIMONIAL	35
III.2.	CAPÍTULO II MEDIO RURAL E ORDENACIÓN URBANÍSTICA	36
III.3.	CAPÍTULO III FUNCIÓN PÚBLICA	42
III.4.	CAPÍTULO IV. MEDIDAS EN MATERIA DE CONTRATACIÓN	50
IV.	DISPOSICIÓN TRANSITORIA	53
V.	DISPOSICIÓN DERROGATORIA	57
VI.	DISPOSICIÓN DERRADEIRAS	61



EXPOSICIÓN DE MOTIVOS

I. EXPOSICIÓN DE MOTIVOS

A definición dos orzamentos como a expresión cifrada, conxunta e sistemática das obrigas que, como máximo, se poderán recoñecer e dos dereitos que se prevé liquidar durante o exercicio orzamentario, pon de manifesto as limitacións, fundamentalmente temporais, que condicionan os preceptos xurídicos contidos nas leis de orzamentos.

De ahí, que a eficaz execución da política económica deseñada nos Orzamentos Xerais da Comunidade Autónoma para o ano 2011 demande a adopción de medidas lexislativas complementarias que garden relación cos gastos e ingresos previstos na norma orzamentaria, ben polo seu contido económico-financeiro, ben pola súa incidencia na busca dunha maior eficiencia da organización administrativa, e que se formulen cunha vocación de permanencia superior á anualidade orzamentaria.

Pola súa natureza, axustándose á doutrina establecida polo Tribunal Constitucional, estas medidas lexislativas adóptanse a través de leis específicas ás que, tradicionalmente, o noso ordenamento xurídico denominou como Leis de Medidas ou Leis de Acompañamento. Na nosa Comunidade, estas leis estendéronse dende finais dos noventa ata o 2005 e serviron de complemento para a implantación dun marco regulatorio de política fiscal, financeira e de organización administrativa.

Na actual situación de incerteza económica, resulta necesario recuperalas como instrumento necesario para a consecución destas políticas e para o cumprimento dos obxectivos económicos por elas perseguidos. Dende a perspectiva da actividade que desenvolve a Comunidade Autónoma de Galicia, cuxos obxectivos explícitanse na Lei de Orzamentos Xerais da Comunidade para o ano 2011, e ao obxecto de contribuír a unha maior eficacia e eficiencia destes, dítase a presente Lei como norma que, polo carácter permanente das súas disposicións, contén un conxunto de medidas referidas a diferentes áreas de actividade que contribúen á consecución de determinados obxectivos de orientación plurianual perseguidos pola comunidade a través da execución orzamentaria.

De acordo co exposto, a Lei estruturase en dous títulos, o primeiro dedicado as medidas de carácter fiscal e o segundo as de carácter administrativo. O título primeiro estruturase en catro capítulos dedicados, respectivamente, aos tributos cedidos, aos tributos propios, as normas de aplicación dos tributos e a organización da administración tributaria. O título segundo consta de tamén de catro capítulos que se corresponden, respectivamente, co réxime financeiro, orzamentario e patrimonial, co medio rural e a ordenación urbanística, coa función pública e con medidas en materia de contratación. Finalmente, a lei conta con unha disposición transitoria, unha disposición derogatoria e seis disposicións derradeiras.

A Lei contén no seu título primeiro un conxunto de normas de carácter fiscal. En primeiro lugar, en canto aos tributos cedidos, o capítulo I deste título recolle, dentro do marco establecido para o exercicio das competencias normativas pola Lei 22/2009, do 18 de

decembro, pola que se regula o sistema de financiamento das Comunidades Autónomas de réxime común e Cidades con Estatuto de Autonomía e se modifican determinadas normas tributarias, unha serie de medidas que afectan ao imposto sobre a renda das persoas físicas, ao imposto sobre sucesións e doazóns, ao imposto sobre transmisións patrimoniais e actos xurídicos documentados e á taxa fiscal sobre xogos de sorte, envite ou azar.

Polo que se refire ao Imposto sobre a Renda das Persoas Físicas establécense tres deducións novas e amplíase o ámbito dunha xa existente. A dedución por autoemprego beneficiaba ás mulleres calquera que fose a súa idade e aos homes menores de 35 anos. A situación actual de crise económica e o aumento do número de desempregados fai aconsellable ampliar o beneficio fiscal eliminando a limitación de idade para o caso dos homes.

En canto ás deducións novas, establécense unha dedución por acollemento familiar na liña de seguir apoiando as deducións no ámbito persoal e familiar, así como dúas deducións orientadas a fomentar o investimento na comunidade autónoma coa finalidade de impulsar a iniciativa privada para a saída da crise económica e fomento do emprego, polo que se esixe que ese investimento veña acompañado da creación de emprego e se manteña durante un período de tres anos. Neste senso, establécense a dedución, na cota íntegra autonómica, por investimento na adquisición de accións ou participacións sociais en entidades novas ou de recente creación e tamén a correspondente ás cantidades investidas durante o exercicio na adquisición de accións como consecuencia de acordos de ampliación de capital subscritos por medio do segmento de empresas en expansión do Mercado Alternativo Bursátil.

Como última novidade, establécense a escala autonómica do IRPF de acordo coa nova normativa que regula o financiamento autonómico que obriga á súa aprobación por cada comunidade autónoma, sen que se produzan incrementos dos tipos establecidos para cada un dos seus tramos.

No imposto sobre sucesións e doazóns, coa finalidade de promover as agrupacións de propietarios forestais, establécense para as adquisicións, por causa de morte ou por doazón, de parcelas forestais incluídas na superficie de xestión conxunta destas agrupacións, unha redución do 99% do valor destas parcelas.

No imposto sobre transmisións patrimoniais e actos xurídicos documentados, por unha parte, establécense unha dedución na cota do 100% na modalidade de transmisións patrimoniais onerosas, aplicable aos arrendamentos de terreos rústicos. Por outra, en consonancia coa promoción das agrupacións de propietarios forestais dotadas de personalidade xurídica, establécense unha dedución na cota do 100% para as transmisións onerosas de parcelas forestais incluídas na superficie de xestión conxunta ou de comercialización de producións que realicen este tipo de agrupacións.

Este capítulo péchase co establecemento dos tipos de gravame da taxa fiscal sobre o

xogo, nos casos dos casinos de xogo e das máquinas ou aparatos automáticos aptos para a realización de xogos.

Polo que se refire aos tributos propios se procede ao establecemento de exencións nos tributos sobre o xogo, en concreto no imposto sobre o bingo, para aqueles que dada a súa entidade están excluídos do ámbito de aplicación e, polo tanto, das formalidades e requisitos establecidos na Lei 14/1985, do 23 de outubro, reguladora dos xogos e as apostas de Galicia.

No capítulo III deste título modifícanse normas relativas á aplicación dos tributos. No que se refire a comprobación de valores, modifícase a normativa existente por dous motivos: o primeiro, para dar validez xurídica, no ámbito desta comunidade autónoma, aos valores publicados por outras comunidades autónomas para os bens situados nos seus territorios, dando así entrada a medios de comprobación distintos do ditame de peritos e permitindo maior axilidade no procedemento xestor; o segundo, para adecuar a normativa á eliminación da obriga do visado colexial para os ditames periciais. Ademais, introdúcese certas modificacións nas obrigas formais dos notarios en prol da remisión por vía telemática da declaración informativa comprensiva dos elementos básicos da escritura.

Por último, este capítulo da lei establece a obriga de autoliquidación por parte dos suxeitos pasivos da taxa fiscal sobre o xogo realizado a través de máquinas tipo A especial, B e C, na forma, lugar e prazos establecidos por orde da consellería competente en materia de facenda. Tamén establece a obriga de ingresar no momento da presentación da autoliquidación a cota anual correspondente.

No capítulo IV recóllense dúas medidas dirixidas a mellora da administración tributaria. Así, en primeiro lugar, contén unha nova regulación da encomenda de competencias na aplicación dos tributos ás oficinas liquidadoras de distrito hipotecario. En segundo e último lugar, seguindo tamén a senda da racionalización administrativa, considerando o marco da actual situación económica e coa conciencia de que a loita contra as bolsas de fraude fiscal convértese nun elemento primordial para a administración tributaria, autorízase a creación da Axencia Tributaria de Galicia.

O obxectivo perseguido non é outro que revisar a estrutura orgánica actual na que conflúen servizos centrais, departamentos territoriais e órganos ou oficinas con competencias específicas e deseñar a organización da Administración Tributaria autonómica, á que se encomendará a aplicación de todos os tributos propios, así como, por delegación do Estado, dos tributos estatais cedidos, como instrumento ao servizo dos intereses da Comunidade Autónoma de Galicia para a aplicación efectiva dos recursos ao seu cargo.

Esta organización debe poder adaptarse, ademais, a novas situacións fiscais e levar a cabo as actuacións precisas de colaboración e coordinación coa Administración tributaria estatal, a doutras Comunidades Autónomas, e as Facendas locais, contribuíndo á eficacia

do sistema tributario español.

No seu deseño debe buscarse un modelo que contribúa a incrementar a capacidade de xestión e a especialización, que conte cos medios materiais e persoais idóneos, e cun réxime xurídico que se adapte ás singularidades da actividade que debe desenvolver, gozando da conveniente flexibilidade para o exercicio das súas funcións e que adopte a forma que mellor responda aos principios previstos con carácter xeral na Constitución Española e no Estatuto de Autonomía.

Para lograr os obxectivos descritos, considérase que o modelo máis axeitado consiste nunha axencia pública autonómica dotada de personalidade xurídica propia e plena capacidade de obrar, con patrimonio e tesouraría propios e autonomía funcional, financeira e de xestión para o cumprimento dos seus fins.

Este ente exercerá as potestades administrativas para a aplicación dos tributos e a recadación executiva dos demais ingresos de dereito público da Facenda Pública galega, a potestade sancionadora en materia tributaria e a revisión en vía administrativa dos actos ditados no exercicio das competencias anteriores, apoiándose nun modelo organizativo que parta da fixación duns obxectivos, para a súa posterior avaliación e control, coa conseguinte esixencia de responsabilidade polos resultados obtidos e o respecto dos dereitos dos cidadáns.

No Título II, dedicado as normas de carácter administrativo, o capítulo I recolle modificacións relativas á xestión orzamentaria e patrimonial. En primeiro lugar, facúltase para a modificación dos límites de compromisos de gasto futuros. En segundo lugar, introdúcese un precepto sobre a necesidade de que as propostas normativas, os plans e programas de contido económico financeiro dispoñan dunha memoria na que se avalíen adecuadamente os custos. Por último, establécese a posibilidade de que o patrimonio das extintas cámaras agrarias locais poda aplicarse a fins de interese agrario no ámbito territorial de Galicia.

No capítulo II deste título, contéplanse unha serie de medidas tendentes ao establecemento dun marco que facilite e promova a reorganización da propiedade forestal. Así, destacase a importancia da posta en marcha de agrupacións de propietarios forestais e establécense medidas que incentivan a agrupación de predios mediante a redución da superficie necesaria para as concentracións de carácter privado.

En segundo lugar, neste capítulo, procédese á reorganización dos instrumentos de xestión da Xunta de Galicia no terreo do desenvolvemento rural. Con esta medida perséguese unha xestión responsable dos medios de que dispón a Administración autonómica, a través da supresión de entidades e a adscrición dos seus medios materiais e persoais a outras entidades existentes e acordos coas novas funcións que van desempeñar. Neste sentido, autorízase ao Consello da Xunta de Galicia a proceder á disolución da Sociedade Anónima para o Desenvolvemento Comarcal de Galicia e da Sociedade Anónima Xestora

do Banco de Terras de Galicia, quedando integrados os seus bens patrimoniais na Axencia Galega de Desenvolvemento Rural e no Instituto de Estudos do Territorio. Tamén se autoriza ao Consello da Xunta a extinguir as fundacións para o desenvolvemento das comarcas por imposibilidade de realizar o fin fundacional; aos bens e dereitos resultantes da liquidación destas fundacións de desenvolvemento comarcal daráselles o destino previsto polo fundador ou decidido polo padroado, cando teña recoñecida esta facultade.

Noutro orde, dentro deste capítulo, ante a dificultade existente para promover parques empresariais de entidade en Galicia, realízanse modificacións de cara a resolver os problemas que poden comprometer a viabilidade urbanística do desenvolvemento do só industrial en Galicia, de maneira que, de forma excepcional, se poida incluír no ámbito dos parques empresariais solo rústico de protección para a implantación de infraestruturas, dotacións e instalacións de utilidade pública ou interese social.

O capítulo III, contén diversas modificacións do texto refundido da lei de función pública en materia de postos de traballo de libre designación, plan de ordenación de recursos humanos, rehabilitación da condición de funcionario, excedencia por prestación de servizos no sector público, excedencia por razón da violencia de xénero, adscrición provisional por reingreso ao servizo activo, supostos de cese nun posto de traballo provisto por libre designación ou por alteración do contido ou supresión do posto e do réxime retributivo dos trienios recoñecidos ao persoal interino. Estas modificacións perseguen a adaptación da lexislación de función pública ao disposto no Estatuto Básico do Empregado Público en tanto que é necesario optimizar a distribución dos recursos humanos como mecanismo de previsión dos recursos económicos dispoñibles coa conseguinte mellora na eficiencia da xestión administrativa aumentando a produtividade e eficacia nos servizos aos cidadáns.

Dentro destas modificacións, encóntrase as correspondentes as disposicións adicionais do texto refundido da lei, contéplase, por unha parte, a modificación do dereito a percibir o recoñecemento económico do complemento de destino que a lei de orzamentos do Estado fixa para os directores/as xerais, que se restrinxen para os cargos públicos incluídos no ámbito de aplicación da lei de incompatibilidades de altos cargos da Administración Autonómica, exceptuando expresamente ao persoal eventual, a modificación de oficio das relacións de postos de traballo como consecuencia do cambio no sistema de provisión de postos de traballo das xefaturas de servizo e postos equivalentes, así como a incorporación dunha nova disposición que prevé un plan de funcionarización para o persoal laboral fixo a través dun proceso selectivo independente de promoción interna por concurso-oposición.

No capítulo IV deste título, recóllense dúas medidas en materia de contratación. A primeira delas dirixida á reserva da participación, en determinados procedementos de adxudicación de contratos, a centros especiais de emprego e empresas de inserción laboral. Medida de carácter sociolaboral que permite, pero non impón, a reserva de contratos cun límite do 3% do importe dos contratos adxudicados no exercicio orzamentario

inmediatamente anterior mediante contratos menores ou procedementos negociados por razón dá contía.


Tamén destaca, en segundo lugar, a creación, sen incremento do gasto, dun órgano colexiado independente para o coñecemento e resolución das cuestións de nulidade formuladas e dos recursos especiais en materia de contratación que se interpoñan en relación cos procedementos de contratación das entidades do sector público.

A disposición transitoria, contempla o réxime das condicións laborais do persoal afectado pola reorganización dos instrumentos de xestión da Xunta de Galicia no eido do desenvolvemento rural.

Na súa disposición derogatoria, a lei contén catro apartados destinados a derogar preceptos e normas que quedaron sen obxecto ou contido como consecuencia do establecido noutras disposicións da lei.

As disposicións derradeiras recollen un conxunto de modificacións legais reguladoras de diferentes ámbitos sectoriais. Así se se permite que as leis anuais de orzamentos establezan criterios específicos de afectación dunha parte do Fondo de Compensación Ambiental dotado cos recursos procedentes do canon eólico e se crea unha Comisión de Seguimento da execución dos proxectos de desenvolvemento de natureza industrial asociados aos parques eólicos, coa finalidade de garantir a execución das actuacións polas que os proxectos foron seleccionados. Así mesmo modifícase o ámbito subxectivo da autorización polo Consello da Xunta dos convenios de contido económico.

Noutra orde, realízanse dúas modificacións legais motivadas pola reorganización dos instrumentos de xestión da Xunta de Galicia no eido do desenvolvemento rural e determínase o carácter do silencio administrativo en determinadas solicitudes e reclamacións formuladas polos profesionais do Servizo Galego de Saúde.



TÍTULO I MEDIDAS FISCAIS

II. TÍTULO I MEDIDAS FISCAIS

II.1. CAPÍTULO I Tributos cedidos

Artigo 1º.-*Imposto sobre a renda das persoas físicas.*

Un.- Modifícase o artigo 52 Un da Lei 14/2006, do 28 de decembro, de orzamentos xerais da Comunidade Autónoma de Galicia para o ano 2007, que queda redactado como segue:

“Un. As persoas que causen alta por primeira vez durante o período impositivo no censo de empresarios profesionais e retedores como consecuencia do establecido no artigo 3.2 a) do Real Decreto 1065/2007, do 27 de xullo, polo que se aproba o Regulamento Xeral das actuacións e os procedementos de xestión e inspección tributaria e de desenvolvemento das normas comúns dos procedementos de aplicación dos tributos, e manteñan a devandita situación durante un ano natural, poderán deducir 300 euros da cota íntegra autonómica do imposto sobre a renda das persoas físicas, no período impositivo en que se produza a alta, sempre que desenvolvan a súa actividade no territorio da Comunidade Autónoma de Galicia.”

Dous.- Establécese a seguinte dedución por acollemento na cota íntegra autonómica do imposto sobre a renda das persoas físicas:

“Os contribuíntes poderán deducir da cota íntegra autonómica, a cantidade de 300 euros por cada menor en réxime de acollemento familiar simple, permanente, provisional ou preadoptivo, administrativo ou xudicial, formalizado polo órgano competente en materia de menores da Xunta de Galicia, sempre que convivan co menor máis de 183 días durante o período impositivo e non teñan relación de parentesco. Se o tempo de convivencia durante o período impositivo fose inferior a 183 días e superior a 90 días, o importe da dedución por cada menor acollido será de 150 euros.

Non dará lugar a esta dedución o suposto de acollemento familiar preadoptivo cando se producise a adopción do menor durante o período impositivo, sen prexuízo da aplicación, se é o caso, da dedución por adopción.

No caso de acollemento de menores por matrimonio, ou polas parellas de feito ás que se refire a disposición adicional terceira da Lei 2/2006, do 14 de xuño, de dereito civil de Galicia, o importe da dedución ratearase por partes iguais na declaración de cada un deles, se optasen pola declaración individual.

A práctica desta dedución quedará condicionada á xustificación documental axeitada e suficiente do suposto de feito e os requisitos que determinen a súa aplicabilidade.”

Tres.- Establécese a seguinte dedución por investimento na adquisición de accións ou participacións sociais en entidades novas ou de recente creación, na cota íntegra autonómica do imposto sobre a renda das persoas físicas:

“1. Os contribuíntes poderán deducir na cota íntegra autonómica e cun límite de 4.000 euros, o 20% das cantidades invertidas durante o exercicio na adquisición de accións ou participacións sociais como consecuencia de acordos de constitución de sociedades ou de ampliación de capital en sociedades anónimas, limitadas, anónimas laborais ou limitadas laborais, sempre que se cumpran os seguintes requisitos:

- a) A participación do contribuínte computada xunto coas do cónxuxe ou persoas unidas por razón de parentesco, en liña directa ou colateral, por consanguinidade ou afinidade ata o terceiro grao incluído, non pode ser superior ao 40% nin inferior ó 1% do capital social da sociedade obxecto do investimento ou dos seus dereitos de voto, en ningún momento e durante os tres anos seguintes á constitución ou ampliación.

- b) A entidade na que hai que materializar o investimento debe cumprir os seguintes requisitos:

1º.- Debe ter o domicilio social e fiscal en Galicia e mantelo durante os tres anos seguintes á constitución ou ampliación.

2º.- Debe desempeñar unha actividade económica durante os tres anos seguintes á constitución ou ampliación. Para tal efecto, non debe ter por actividade principal a xestión dun patrimonio mobiliario ou inmobiliario, de acordo co disposto polo artigo 4.8.dos.a da Lei 19/1991, do 6 de xuño, do imposto sobre o patrimonio.

3º.- Debe contar, como mínimo, con dúas persoas ocupadas con contrato laboral e a xornada completa, dada de alta no réxime xeral da Seguridade Social e con residencia habitual en Galicia, durante os tres anos seguintes á constitución ou ampliación

4º.- En caso de que o investimento se realizase mediante unha ampliación de capital, a sociedade mercantil debeu ser constituída nos tres anos anteriores á data desta ampliación, e ademais durante os vinte e catro meses seguintes á data do inicio do período impositivo do imposto sobre sociedades no que se realizase a ampliación, a súa plantilla media con residencia habitual en Galicia se incremente, polo menos en dúas persoas, respecto da plantilla media con residencia habitual en Galicia dos doce meses anteriores, e o devandito incremento se manteña durante un período adicional doutros vinte e catro meses.

Para o cálculo da plantilla media total da empresa e do seu incremento tomaranse as persoas empregadas, nos termos que dispoña a lexislación laboral, tendo en conta a xornada contratada en relación á xornada completa.

- c) O contribuínte pode formar parte do consello de administración da sociedade na que materializou o investimento, pero en ningún caso pode levar a cabo fun-

cións executivas nin de dirección durante un prazo de 10 anos. Tampouco pode manter unha relación laboral coa entidade obxecto do investimento durante ese mesmo prazo.

- d) As operacións nas que sexa aplicable a dedución deben formalizarse en escritura pública, na que debe especificarse a identidade dos investidores e o importe do investimento respectivo.
- e) As participacións adquiridas deben manterse no patrimonio do contribuínte durante un período mínimo de tres anos seguintes á constitución ou ampliación.

2. O incumprimento dos requisitos e as condicións establecidos comporta a perda do beneficio fiscal e o contribuínte debe incluír na declaración do imposto correspondente ao exercicio no que se produciu o incumprimento a parte do imposto que se deixou de pagar como consecuencia da dedución practicada, xunto cos intereses de demora devengados.”

Catro.- Establécese a seguinte dedución por investimento en accións de entidades que cotizan no segmento de empresas en expansión do Mercado Alternativo Bursátil, na cota íntegra autonómica do imposto sobre a renda das persoas físicas:

“1. Os contribuíntes poderán deducir na cota íntegra autonómica e cun límite de 4.000 euros, o 20% das cantidades investidas durante o exercicio na adquisición de accións como consecuencia de acordos de ampliación de capital subscritos por medio do segmento de empresas en expansión do Mercado Alternativo Bursátil, aprobado por acordo do Consello de Ministros do 30 de decembro de 2005.

2. Para poder aplicar a dedución á que se refire a alínea 1 deben cumprirse os seguintes requisitos:

- a) A participación conseguida polo contribuínte na sociedade obxecto do investimento non pode ser superior ao 10% do seu capital social nin inferior ó 1%.
- b) As accións adquiridas deben manterse no patrimonio do contribuínte durante un período de dous anos, como mínimo.
- c) A sociedade obxecto do investimento debe ter o domicilio social e fiscal en Galicia, e non debe ter como actividade principal a xestión dun patrimonio mobiliario ou inmobiliario, de acordo co disposto polo artigo 4.8.dos.a da Lei do Estado 19/1991, do 6 de xuño, do imposto sobre o patrimonio.

Os requisitos indicados nas letras a) e c) anteriores deberán cumprirse durante todo o prazo de mantemento indicado na letra b), contados dende a data de adquisición da participación.

3. O incumprimento dos requisitos anteriores comporta a perda do beneficio fiscal e o contribuínte debe incluír na declaración do imposto correspondente ao exercicio no que se produciu o incumprimento a parte do imposto que se deixou de pagar como consecuencia da aplicación da dedución practicada, xunto cos intereses de demora de-

vengados.

4. A dedución contida neste artigo resultará incompatible, para os mesmos investimentos, coa dedución por investimento na adquisición de accións ou participacións sociais en entidades novas ou de recente creación.”

Cinco.- Apróbase a escala autonómica do Imposto sobre a Renda das Persoas Físicas seguinte:

Base liquidable Ata euros	Cota íntegra Euros	Resto base liquidable Ata euros	Tipo aplicable Porcentaxe
0	0	17.707,20	12
17.707,20	2.124,86	15.300,00	14
33.007,20	4.266,86	20.400,00	18,5
53.407,20	8.040,86	En diante	21,5

As leis de orzamentos xerais da Comunidade Autónoma de Galicia poderán modificar a escala prevista nesta alínea.

Artigo 2º.-*Imposto sobre sucesións e doazóns.*

Cando na base imponible dunha adquisición mortis causa ou inter vivos, estean incluídas parcelas forestais que formen parte da superficie de xestión conxunta ou de comercialización de producións que realicen agrupacións de propietarios forestais dotadas de personalidade xurídica, practícase unha redución do 99% do valor de ditas fincas sempre que se manteña a propiedade polo prazo, contido nos estatutos sociais, que reste para o cumprimento do compromiso da agrupación de permanencia obrigatoria na xestión conxunta das parcelas.

Esta redución non se aplicarán de oficio e deberá ser solicitada polo suxeito pasivo na presentación da declaración do imposto, acompañada dos xustificantes expedidos pola Consellería de Medio Rural que acrediten a inclusión de ditas fincas na agrupación de propietarios forestais. A solicitude non se poderá rectificar con posterioridade, agás que a rectificación se presente no período regulamentario de declaración.

A porcentaxe de redución aplicarase sobre o resultado de deducir do valor do ben ou dereito o importe das cargas e gravames que prevé o artigo 12 da Lei 29/1987, do 18 de decembro, así como a parte proporcional do importe das débedas e gastos que sexan deducibles de acordo cos artigos 13, 14 e 17 da mesma lei, sempre que estes últimos se tivesen en conta na fixación da base imponible individual do causahabente ou donatario.

Se deixan de cumprir os requisitos establecidos nas reducións anteriores, deberase pagar a parte do imposto que se deixase de ingresar como consecuencia da redución practicada e os xuros de demora.

Artigo 3º.-Imposto sobre transmisións patrimoniais e actos xurídicos documentados.

Un.- Establécese unha dedución na cota do 100% na modalidade de transmisións patrimoniais onerosas, do imposto sobre transmisións patrimoniais e actos xurídicos documentados, no suposto de arrendamento de fincas rústicas, sempre que as persoas arrendatarias teñan a condición de agricultor profesional en canto á dedicación de traballo e procedencia de rendas e sexan ben titulares dunha explotación agraria á cal queden afectos os elementos obxecto do aluguer ou ben socios dunha sociedade agraria de transformación, cooperativa de explotación comunitaria da terra ou sociedade civil que sexa titular dunha explotación agraria á que queden afectos os elementos arrendados.

Para os efectos desta dedución os termos de «explotación agraria» e «agricultor/a profesional» son os definidos na Lei 19/1995, do 4 de xullo, de modernización das explotacións agrarias e se acreditarán mediante certificación expedida polo órgano correspondente da Comunidade Autónoma. A dedución quedará condicionada á presentación no prazo de declaración destes xustificantes.

Dous.- Establécese unha dedución na cota do 100% no imposto de transmisións patrimoniais onerosas e actos xurídicos documentados para as transmisións onerosas de parcelas forestais incluídas na superficie de xestión conxunta ou de comercialización de producións que realicen agrupacións de propietarios forestais dotadas de personalidade xurídica, sempre que esas transmisións sexan realizadas entre membros da mesma ou ben con terceiros que se integren en dita agrupación e manteñan a propiedade polo prazo, contido nos estatutos sociais, que reste para o cumprimento do compromiso da agrupación de permanencia obrigatoria na xestión conxunta das parcelas.

A dedución quedará condicionada á presentación no prazo de declaración, dos xustificantes expedidos pola Consellería de Medio Rural que acrediten a inclusión de ditas fincas na agrupación de propietarios forestais.

Artigo 4º.-Taxa fiscal sobre o xogo.

Un.- Modifícanse os tipos de gravame e as cotas fixas da taxa sobre xogos de sorte, envite ou azar, no sentido que a continuación se indica:

1) Nos casinos de xogo aplicarase a seguinte tarifa :

Porción de base imponible comprendida entre euros	Tipo aplicable porcentaxe
Entre 0 e 1.677.207	22
Entre 1.677.207'01 e 2.775.016	38
Entre 2.775.016'01 e 5.534.788	49
Máis de 5.534.788	60

2) Nos casos de explotación de máquinas ou aparatos automáticos aptos para a rea-

lización dos xogos, a cota determinarase en función da clasificación das máquinas realizada pola Lei 14/1985, do 23 de outubro, reguladora dos xogos e apostas en Galicia, segundo as normas seguintes :

A) Máquinas tipo A especial:

Cota anual: 500 euros.

B) Máquinas tipo B ou recreativas con premio.

- a) Cota anual: 3.740 euros.
- b) Cando se trate de máquinas ou aparellos automáticos tipo "B", nos que poidan intervir dous ou máis xogadores/as de forma simultánea e sempre que o xogo de cada un deles sexa independente do realizado por outros xogadores/as, serán de aplicación as seguintes cotas:
 - i. Máquinas ou aparellos de dous xogadores/as: dúas cotas de acordo co previsto na letra a).
 - ii. Máquinas ou aparellos de tres ou máis xogadores: 7.640 euros maillo resultado de multiplicar por 3.080 o produto do número de xogadores/as polo prezo máximo regulamentario da partida.
- c) No caso de homologación dunha máquina de tipo B cun prezo máximo de partida superior ao prezo máximo regulamentario de 0'20 euros, as cotas tributarias establecidas nas letras a) e b) anteriores incrementaríanse en 18'80 euros por cada céntimo de euro no que se incremente o prezo máximo regulamentario.
- d) No caso de modificación do prezo máximo regulamentario de 0'20 euros para a partida en máquinas de tipo "B" ou recreativas con premio, a cota tributaria anual correspondente incrementaríase en 18'80 euros por cada céntimo de euro da diferenza entre os prezos máximos regulamentarios, ou, de ser o caso, entre o novo prezo máximo regulamentario e o prezo máximo de partida homologado.

C) Máquinas tipo C ou de azar.

Cota anual: 5.460 euros.

Dous.- Quedan exentos do pagamento da taxa fiscal sobre xogos de sorte, envite ou azar, os xogos excluídos do ámbito de aplicación da lei reguladora do xogo de Galicia.

II.2. CAPÍTULO II Tributos propios

Artigo 5º.-Imposto sobre o bingo.

Modifícase o artigo 1 da lei 7/1991, do 19 de xuño, de tributación sobre o xogo,

quedando redactado como segue:

“Artigo 1. Feito imponible.

1. Constitúe o feito imponible a participación no xogo do bingo nos locais onde este se celebre ou organice.

2. Quedan exentos do pagamento deste imposto o xogo do bingo que se considere excluído do ámbito de aplicación da lei reguladora do xogo de Galicia.”

II.3. CAPÍTULO III Normas de aplicación dos tributos

Artigo 6º.-Comprobación de valores.

Un.- Modifícase o artigo 59 da Lei 16/2007, do 26 de decembro, de orzamentos xerais da Comunidade Autónoma de Galicia para o ano 2008 que queda redactado como segue:

“Artigo 59. - Comprobación de valores. Norma xeral

Para efectuar a comprobación de valores para os efectos dos impostos sobre sucesións e doazóns e sobre transmisións patrimoniais e actos xurídicos documentados, a Administración tributaria poderá utilizar, indistintamente, calquera dos medios previstos no artigo 57 da Lei 58/2003, do 17 de decembro, xeral tributaria.

A Comunidade Autónoma de Galicia recoñece eficacia xurídica aos valores establecidos por outra comunidade autónoma para os bens inmoables situados no seu territorio, en virtude dalgún dos medios de valoración incluídos no artigo 57.1 da Lei 58/2003, do 17 de decembro, xeral tributaria, e poderá aplicar os devanditos valores para os efectos dos Impostos sobre Sucesións e Doazóns e sobre Transmisións Patrimoniais e Actos Xurídicos Documentados.”

Dous.- Modifícase o artigo 62 da Lei 16/2007, do 26 de decembro, de orzamentos xerais da Comunidade Autónoma de Galicia para o ano 2008 que queda redactado como segue:

“Artigo 62. - Ditame de peritos da Administración.

Nas comprobacións de valor de inmoables polo medio establecido no artigo 57.1.e da Lei 58/2003, do 17 de decembro, xeral tributaria, estas poderán tomar como referencia, aos efectos de motivación suficiente, os valores contidos nos rexistros oficiais de carácter fiscal do artigo 60 desta lei, os valores básicos e prezos medios de mercado a que

alude a normativa técnica mencionada no artigo 61 desta lei, ou ben os valores establecidos por outra comunidade autónoma para os bens inmobles situados no seu territorio.”

Tres.- Modifícase o artigo 64, regras 1º e 2º, da Lei 16/2007, do 26 de decembro, de orzamentos xerais da Comunidade Autónoma de Galicia para o ano 2008 que queda redactado como segue:

“1º. O órgano competente trasladará aos interesados a valoración motivada que figure no expediente referida ao ben obxecto da taxación, calquera que fose o medio de comprobación utilizado de entre os sinalados no artigo 57 da Lei 58/2003, do 17 de decembro, xeral tributaria, concedéndolle un prazo de 1 mes e dez días para que proceda, tanto ao nomeamento dun perito que deberá ter título axeitado á natureza dos bens e dereitos a valorar, debendo achegarse no momento do nomeamento proba suficiente do título que se ostenta, como á emisión dun ditame debidamente motivado de acordo co establecido no artigo 160 do Real Decreto 1065/2007, do 27 de xullo, polo que se aproba o Regulamento Xeral das actuacións e os procedementos de xestión e inspección tributaria e de desenvolvemento das normas comúns dos procedementos de aplicación dos tributos.

O perito designado polo contribuínte terá á súa disposición na sede do órgano competente para a tramitación deste procedemento e no prazo anteriormente sinalado, a relación de bens e dereitos obxecto da taxación pericial contraditoria.

Entenderase acreditado o título axeitado á natureza do ben a valorar, e a suficiente motivación, se o informe pericial se presenta visado polo colexio profesional correspondente.

2º. Transcorrido o prazo de 1 mes e dez días sen facer a designación de perito coa acreditación suficiente do título que ostenta, ou sen emitir o ditame pericial suficientemente motivado, considerarase que desiste do seu dereito a promover a taxación pericial contraditoria, darase por finalizado o procedemento e entenderase a conformidade do interesado co valor comprobado. Neste caso, confirmarase a liquidación inicial, cos correspondentes xuros de mora, e non poderá promover unha nova taxación pericial contraditoria.”

Catro.- Modifícase o artigo 64, regra 4º letra b), da Lei 16/2007, do 26 de decembro, de orzamentos xerais da Comunidade Autónoma de Galicia para o ano 2008 que queda redactado como segue:

“Realizada a designación, remitirase á persoa ou entidade designada a relación de bens e dereitos a valorar e copia tanto da valoración da Administración coma da efectuada polo perito designado polo obrigado tributario, para que no prazo dun mes, a contar a partir do día seguinte da entrega, proceda a confirmar algunha delas ou realice unha nova valoración, que será definitiva. Neste último caso a nova valoración debe de estar suficien-

temente motivada de acordo co establecido no artigo 160 do Real Decreto 1065/2007, do 27 de xullo, polo que se aproba o Regulamento Xeral das actuacións e os procedementos de xestión e inspección tributaria e de desenvolvemento das normas comúns dos procedementos de aplicación dos tributos.

En caso de que o perito terceiro non emita a valoración no prazo establecido no parágrafo anterior, poderase deixar sen efecto a súa designación, sen prexuízo das responsabilidades que resulten esixibles pola falta de emisión do ditame en prazo. En caso de que se deixe sen efecto a designación, haberá de notificarse esta circunstancia ao perito terceiro e ao obrigado tributario, procedéndose, se é o caso, á liberación dos depósitos dos seus honorarios e ao nomeamento doutro perito terceiro por orde correlativo.

A renuncia do perito terceiro ou a falta de presentación en prazo impedirán a súa designación no exercicio corrente e nos dous posteriores a este.

En caso de que a valoración realizada polo perito terceiro adoeza de defectos de motivación, e tal circunstancia sexa apreciada polo órgano competente para a tramitación deste procedemento, ou en vía de recurso por un órgano administrativo ou xudicial, a Administración tributaria procederá ou ben á remisión da documentación para a realización dunha nova valoración ao mesmo perito ou ben ao nomeamento dun novo, de acordo co procedemento e prazos sinalados neste artigo. No primeiro suposto non procederá a realización de novo depósito nin novo pagamento de honorarios. No segundo caso procederá a devolución polo perito dos honorarios satisfeitos xunto co interese legal vixente no período que medie dende a data do pagamento dos honorarios ata a data da súa devolución.

Entenderase suficientemente motivado o informe pericial, se se presenta visado polo colexio profesional correspondente."

Artigo 7º.-Obrigas formais.

Modifícase o artigo 7 da Lei 14/2004, do 29 de decembro, de medidas tributarias e de réxime administrativo, que queda redactado como segue:

"Artigo 7. Obrigas formais dos notarios.

Co fin de facilitar o cumprimento das obrigas tributarias dos contribuíntes e o acceso telemático dos documentos aos rexistros públicos, os notarios destinados na Comunidade Autónoma de Galicia, en colaboración co Consello Xeral do Notariado, remitirán por vía telemática á Consellería de Facenda unha declaración informativa notarial comprensiva dos elementos básicos da escritura e confeccionada cos datos existentes no índice único informatizado notarial a que se refire o artigo 17 da Lei do 28 de maio de 1862, do Notariado. A declaración informativa notarial ou ficha notarial, deberá reproducir fielmente os elementos básicos da escritura, sobre todo aqueles que teñan relevancia para efectos

tributarios, velando o notario pola máis estrita veracidade da ficha, así como pola súa correspondencia cos documentos públicos autorizados e intervidos, sendo responsables de calquera discrepancia que exista entre aquela e estes. Tamén deberán remitir, por solicitude da Consellería de Facenda, copia electrónica das mesmas en conformidade co disposto na lexislación notarial.

A ficha resumo notarial substituirá ao documento notarial nos supostos que determine por orde a Consellería de Facenda, que ademais, establecerá os procedementos, estrutura e prazos en que debe ser remitida a información."

Artigo 8º.-*Liquidación e pagamento da taxa fiscal sobre xogos de sorte envite ou azar, correspondente a máquinas.*

Un.- Os suxeitos pasivos deberán presentar, na forma, lugar e prazo determinados por orde da consellería competente en materia de facenda, unha declaración por cada máquina en explotación, autoliquidando e ingresando a cota anual legalmente establecida que correspondera á tipoloxía e ás características da autorización da máquina.

Nos casos de nova autorización ou de reinicio da explotación da máquina con autorización de explotación en situación de suspensión provisional na data do devengo, a cota que deberán autoliquidar os suxeitos pasivos será:

- a) O 75% da cota anual, se a autorización ou a alta da autorización é posterior ao 31 de marzo do ano en curso.
- b) O 50% da cota anual, se a autorización ou a alta da autorización é posterior ao 30 de xuño do ano en curso.
- c) O 25% da cota anual, se a autorización ou a alta da autorización é posterior ao 30 de setembro do ano en curso.

Dous.- No entanto o disposto na alínea Un anterior, os suxeitos pasivos poderán optar no momento de formular a autoliquidación, polo fraccionamento do importe a ingresar, en pagos fraccionados trimestrais iguais, ingresando os pagamentos trimestrais que estiveran vencidos ao tempo de presentar a autoliquidación e aprazando o ingreso dos restantes, nos períodos de ingreso predeterminados pola orde da consellería competente en materia de facenda.

A opción polo fraccionamento e aprazamento sinalados no parágrafo anterior non precisará de aportación e/ou constitución de garantía algunha nin devengará xuros de mora. Serán requisitos para poder exercer a opción anterior:

- a) Autoliquidar a cota anual vixente.
- b) Presentar a autoliquidación no prazo regulamentariamente establecido pola orde da consellería competente en materia de facenda.
- c) Domiciliar os pagos fraccionados aprazados.

Non será posible aprazar ou fraccionar os pagamentos fraccionados trimestrais. A presentación da solicitude non impedirá o inicio do período executivo, nin o devengo dos recargos correspondentes e os xuros de mora e considerarase incumprimento das obrigas tributarias para tódolos efectos. O incumprimento do pagamento de calquera pagamento fraccionado terá os efectos sinalados na normativa xeral tributaria.

Tres.- Nos casos nos que para unha máquina en explotación, se modificara algunha ou varias das características da súa autorización que supuxera modificación da cota anual, con data de efectos posterior ao peche do prazo de presentación da autoliquidación á que se refire o apartado Un deste artigo, o suxeito pasivo deberá presentar, na forma, lugar e prazo determinados por orde da consellería competente en materia de facenda, unha declaración complementaria autoliquidando e ingresando o importe total da diferenza entre a nova cota anual e a xa autoliquidada.

Para calcular a cota anual segundo as novas características da autorización de explotación da máquina terase en conta a data de efectos, do xeito que especifique a orde da consellería competente en materia de facenda.

Os suxeitos pasivos poderán optar polo fraccionamento e aprazamento á que se refire o punto Dous anterior cos mesmos requisitos, obrigas e formalidades.

Catro.- Cando un suxeito pasivo reinicie a explotación da máquina no segundo ou no terceiro trimestre do ano en curso coa intención de explotala como máximo ata a fin do terceiro trimestre, deberá presentar, na forma, lugar e prazo determinados por orde da consellería competente en materia de facenda, unha declaración complementaria autoliquidando e ingresando:

- a) O 50% da cota anual, se o reinicio da explotación ten efectos para o segundo e o terceiro trimestre.
- b) O 25% da cota anual, se o reinicio da explotación ten efectos para o segundo ou o terceiro trimestre.

No entanto o disposto na letra a), os suxeitos pasivos poderán optar polo fraccionamento e aprazamento á que se refire a alínea Dous anterior cos mesmos requisitos, obrigas e formalidades, e tendo en conta que o número de pagamentos trimestrais será dous.

Para poder acollerse a este réxime, deberán cumprirse os seguintes requisitos:

- a) Que as máquinas se encontren na situación de suspensión provisional á data do 30 de setembro do ano anterior.
- b) Que a autoliquidación na que se exerza a opción por este réxime se presente no prazo regulamentariamente establecido pola orde da consellería competente en materia de facenda, sinalando o número de trimestres nos que se vai manter a máquina en explotación.

Se o suxeito pasivo, unha vez exercida a opción por este réxime, decidira manter a máquina en explotación máis alá da data comprometida, deberá presentar, na forma, lugar e prazo determinados por orde da consellería competente en materia de facenda, unha declaración complementaria, autoliquidando e ingresando o importe total da diferenza entre a cota anual que procedera e a xa autoliquidada.

II.4. CAPÍTULO IV Organización da administración tributaria

Artigo 9º.-Competencias na aplicación dos tributos.

1. Mediante orde da Consellería de Facenda poderase encomendar a determinadas oficinas de distrito hipotecario a cargo dos Rexistradores da Propiedade, todas ou algunhas das funcións relativas á aplicación, revisión ou exercicio da potestade sancionadora, no Imposto sobre Sucesións e Doazóns e no Imposto sobre Transmisións Patrimoniais e Actos Xurídicos Documentados.
2. As compensacións que por esta encomenda perciban os Rexistradores da Propiedade coma titulares das Oficinas Liquidadoras de Distrito Hipotecario, así coma outras cuestións relativas ás relacións entre a Consellería de Facenda e ditas oficinas estableceranse no convenio que a tal efecto se subscriba.

Artigo 10º.- Axencia Tributaria de Galicia.

Un.- Autorízase a creación da Axencia Tributaria de Galicia, coa finalidade de actuar como instrumento para a realización das funcións administrativas de aplicación dos tributos e demais funcións e competencias atribuídas nesta lei e as que se lle puideran atribuír ou encomendar mediante lei ou convenio.

A Axencia Tributaria de Galicia terá natureza de axencia pública autonómica dotada de personalidade xurídica propia e plena capacidade de obrar, con patrimonio e tesourería propios e autonomía funcional, financeira e de xestión para o cumprimento dos seus fins. Estará adscrita á consellería competente en materia de facenda que fixará as directrices e exercerá a tutela e o control de eficacia e eficiencia sobre a súa actividade. A Axencia gozará do tratamento fiscal aplicable á Xunta de Galicia.

Dous.- A Axencia Tributaria de Galicia terá as seguintes funcións:

- a) A aplicación e o exercicio da potestade sancionadora dos tributos propios da Comunidade Autónoma de Galicia, cando a súa lei específica atribúa estas funcións á consellería competente en materia de facenda.
- b) A aplicación e o exercicio da potestade sancionadora dos tributos estatais cedidos á Comunidade Autónoma de Galicia, de acordo co disposto na normativa

reguladora do financiamento autonómico.

- c) A aplicación e o exercicio da potestade sancionadora das recargas que se establezan sobre os tributos estatais.
- d) A aplicación e o exercicio da potestade sancionadora doutros tributos estatais ou locais recadados en Galicia que puidera asumir por delegación ou encomenda.
- e) A recadación dos ingresos de dereito público de natureza non tributaria que a normativa atribúa á consellería competente en materia de facenda.
- f) A revisión en vía administrativa dos actos e actuacións realizados no exercicio das funcións anteriores, con excepción das reclamacións económico-administrativas, da revisión de actos nulos de pleno dereito e aquelas outras que por lei específica se atribúa a outros órganos.
- g) A colaboración e coordinación coas demais administracións tributarias e en particular a participación nos órganos de goberno da Axencia Estatal de Administración Tributaria ou, no seu caso, nos das entidades que se cren en relación coa aplicación dos tributos en Galicia.
- h) Calquera outra función que lle sexa atribuída por lei ou por convenio administrativo.

Tres.- O patrimonio da Axencia estará integrado polos bens e dereitos que se lle adscriban e polos que adquira por calquera título, conforme ao disposto na lexislación de patrimonio da Comunidade Autónoma de Galicia. O réxime xurídico deste patrimonio será o previsto na referida lexislación patrimonial.

Os bens que se lle adscriban conservarán a cualificación xurídica orixinaria e a adscripción non implica ningunha transmisión do dominio público nin desafectación.

Catro.- Os recursos da Axencia Tributaria de Galicia estarán constituídos por:

- a) As dotacións que se lle asignen nos orzamentos xerais da comunidade autónoma.
- b) As subvencións e demais transferencias correntes ou de capital que, con cargo ao orzamento de calquera ente público, poidan corresponderlle.
- c) Os rendementos procedentes dos bens ou dereitos do seu patrimonio.
- d) Os ingresos procedentes da prestación de servizos a calquera outra persoa física ou xurídica, pública ou privada.
- e) As achegas voluntarias, doazóns, herdanzas e legados e demais achegas a título gratuíto de entidades privadas e particulares.
- f) Calquera outro ingreso de dereito público ou privado que normativamente lle puidera corresponder.

Os recursos que deriven das letras b), d), e) e f) que non estivesen previstos no orzamento da axencia poderanse destinar a financiar maiores gastos por acordo do órgano que resulte competente conforme aos seus estatutos.

A recadación de ingresos tributarios e dos demais recursos de dereito público, derivada da actividade propia da Axencia, forman parte do Tesouro da Comunidade Autónoma de Galicia.

Cinco.- Os actos da Axencia Tributaria ditados no exercicio das súas funcións como poder público son actos administrativos.

As funcións de aplicación dos tributos e a potestade sancionadora atribuídas á Axencia réxense pola Lei xeral tributaria e a súa normativa de desenvolvemento, as normas ditadas pola comunidade autónoma no exercicio da súa competencia en materia tributaria e as disposicións en materia de procedemento administrativo.

Seis.- A Axencia Tributaria de Galicia contará co persoal funcionario e laboral das Administracións Públicas, e de selo caso con persoal laboral propio, quedando reservadas ao persoal funcionario as funcións que impliquen a participación directa ou indirecta no exercicio de potestades públicas ou na salvagarda dos intereses xerais da Comunidade Autónoma de Galicia e das administracións públicas, así como aquelas que se determinen na normativa aplicable en materia de emprego público.

O persoal funcionario rexerase pola normativa aplicable en materia de función pública, coas especificidades que se establezan nos estatutos da axencia.

O persoal laboral da Xunta de Galicia rexerase polo convenio colectivo único para o persoal laboral da Xunta de Galicia, polo texto refundido da Lei do Estatuto dos Traballadores, aprobado por Real Decreto Lexislativo 1/1995, de 24 de marzo e demais normativa que lle resulte de aplicación.

O persoal laboral propio rexerase polo estatuto dos traballadores, polo convenio colectivo que lle resulte de aplicación e demais normativa laboral.

A Axencia contará con persoal directivo, tendo tal consideración o que se determine nos seus estatutos en atención á especial responsabilidade, competencia técnica e relevancia das tarefas asignadas. O réxime xurídico aplicable a este persoal será o previsto no artigo 13 da Lei 7/2007, do 12 de abril, e na normativa de desenvolvemento da Comunidade Autónoma de Galicia.

A aprobación e modificación tanto do cadro de persoal como da proposta de relación de postos de traballo será acordada polos órganos superiores de goberno e dirección, logo do informe favorable dos centros directivos competentes en materia de orzamentos e de función pública, e a contratación será decidida polo órgano que sinala a súa normativa específica ou os seus estatutos. En todo caso, a aprobación da relación de postos de traballo con persoal funcionario e/ou laboral da Xunta de Galicia estará sometida na súa tramitación á normativa xeral establecida na Administración da comunidade autónoma de Galicia sobre modificacións ou aprobacións destes instrumentos de

planificación de persoal.

Ao persoal ao servizo da Axencia Tributaria resultarlle de aplicación o réxime de incompatibilidades previsto para o persoal da Administración da Comunidade Autónoma de Galicia adecuado a súa condición. O seu incumprimento será sancionado conforme a normativa que en cada caso resulte de aplicación.

Corresponderá ós órganos competentes da Axencia deseñar o plan anual de formación do persoal adscrito ó seu cargo, así como a firma de convenios con este obxecto con entidades públicas ou privadas.


Sete.- A Axencia Tributaria de Galicia poderá subscribir convenios de colaboración con outras administracións e entidades públicas, en canto aos ámbitos de actuación que directa ou indirectamente sonlle propios.

A colaboración da axencia con outras administracións públicas ou as súas entidades vinculadas poderá revestir calquera forma admitida en dereito, incluída a constitución ou participación en entidades con personalidade xurídica propia e diferenciada, que esixirá a previa autorización do Consello da Xunta de Galicia por proposta do titular da consellería competente en materia de facenda.

A Axencia participará, en representación da Comunidade Autónoma de Galicia, nos entes e organismos do Estado responsables da aplicación dos tributos estatais cedidos parcialmente.

A Axencia colaborará especialmente coas administracións tributarias doutras comunidades autónomas e da administración local.

Oito.- Dende a data de inicio das súas actividades, a Axencia Tributaria quedará subrogada na posición xurídica da Administración da Comunidade Autónoma de Galicia en tódalas relacións xurídicas que afecten ó ámbito das súas competencias.



TÍTULO II MEDIDAS ADMINISTRATIVAS

III. TÍTULO II MEDIDAS ADMINISTRATIVAS

III.1. CAPÍTULO I Réxime financeiro, orzamentario e patrimonial

Artigo 11º.-*Modificación da porcentaxe de límite de gasto a futuros.*

Engádese un novo punto 8 ao artigo 58 do texto refundido da Lei de Réxime Financeiro e Orzamentario de Galicia, aprobado por Decreto legislativo 1/1999, do 7 de outubro, co seguinte contido:

“8.- O Consello da Xunta, a proposta da persoa titular da consellería competente en materia de facenda, poderá establecer unhas porcentaxes de límite de compromiso de gasto a futuros inferiores, previa xustificación da súa necesidade para garantir a senda de estabilidade orzamentaria comprometida no marco orzamentario plurianual.”

Artigo 12º.-*Propostas normativas e outras actuacións.*

Un.- A formulación de iniciativas legislativas por parte da Xunta de Galicia, así como a aprobación de normas de rango regulamentario, plans ou programas de actuación de contido económico-financeiro requirirán a previa dispoñibilidade dunha memoria económico-financeira que avalíe adecuadamente os custos que esas propostas poidan representar, e que considere as posibilidades ou alternativas existentes para o seu financiamento cando delas poida derivar un incremento do gasto público.

Dous.- O contido mínimo da memoria económico-financeira será establecido por orde da Consellería de Facenda.

Tres.- Antes de proceder a súa tramitación a iniciativa legislativa, norma de rango regulamentario e os plans ou programas de actuación, acompañados da correspondente memoria económica-financeira, deberán remitirse á Consellería de Facenda ao obxecto de que, pola Dirección Xeral de Orzamentos, se proceda a emitir informe de carácter preceptivo, que determine os seus efectos sobre o gasto público tendo en conta a política da Xunta de Galicia e a necesidade de contención do gasto público.

Artigo 13º.-*Integración do patrimonio das extintas cámaras agrarias.*

Modifícase a alínea un da disposición adicional sétima da Lei 11/1995, do 28 de decembro, de orzamentos xerais da Comunidade Autónoma de Galicia para o ano 1996, que queda redactado como segue:

“Un.- O patrimonio das extintas cámaras agrarias locais integrárase definitivamente no patrimonio da Comunidade Autónoma de Galicia e quedará adscrito á consellería competente en materia de agricultura para a súa aplicación a fins de interese agrario no

ámbito territorial de Galicia”.

III.2. CAPÍTULO II Medio rural e ordenación urbanística

Artigo 14º.-Propiedade forestal.

Modifícase o art. 29 da Lei 3/2007, de 9 de abril, de prevención e defensa contra os incendios forestais de Galicia, que queda redactado como segue:

“Artigo 29.-Reorganización da propiedade forestal e fomento das agrupacións de propietarios forestais.

Co obxecto de garantir a defensa contra os incendios forestais e de facilitar a ordenación dos montes e o seu planeamento preventivo, promoverase a reorganización da propiedade forestal e a posta en marcha de agrupacións de propietarios forestais.”

Artigo 15º.-Concentración parcelaria de carácter privado en terreos de monte.

Un.- Modifícase o artigo 57 da Lei 10/1985, do 14 de agosto, de concentración parcelaria para Galicia, que queda redactado como segue:

“Artigo 57.

Cando dous ou máis propietarios titulares de predios integrados en explotacións independentes, mediante permuta ou por calquera outro título, agrupen predios cunha superficie que sexa como mínimo de media hectárea en cultivos intensivos e horta e unha hectárea en labradío ou prado, os gastos correspondentes ao outorgamento de escrituras, inscricións rexistras e outros lexítimos correrán a cargo da consellería competente en materia de agricultura.”

Dous.- Engádese un novo artigo 60 bis á Lei 10/1985, do 14 de agosto, de concentración parcelaria para Galicia, co seguinte contido:

“Artigo 60 bis.

- I. As agrupacións de propietarios de parcelas susceptibles de aproveitamento forestal legalmente constituídas, poderán promover a concentración parcelaria de carácter privado dos terreos aportados á agrupación cumprindo os seguintes requisitos:
 - a) A superficie mínima que se concentrará será de 15 ha, formada por un máximo de tres unidades de superficie en coto redondo, cada unha delas cun 25% -como mínimo- da superficie total.
 - b) A superficie das parcelas propiedade de terceiros incluídas en cada unidade de superficie que se vaia concentrar non será superior ao 30% do total.
 - c) Os propietarios de parcelas susceptibles de aproveitamento forestal deberán es-

- tar constituídas nunha agrupación con personalidade xurídica, que teña como finalidade a xestión e o aproveitamento en común das parcelas mediante unha xestión sostible e viable dos mesmos, concretadas nos aproveitamentos forestais e a súa comercialización.
- d) Os lexítimos representantes da agrupación, solicitarán á Consellería do Medio Rural a iniciación do expediente administrativo que conduza á reorganización das propiedades nos perímetros afectados, incluíndo na solicitude o compromiso expreso de todos os propietarios integrantes da agrupación da aceptación posterior da reorganización da propiedade que se leve a efecto.
 - e) A reorganización finalmente aprobada, deberá incluír a nova situación de todos os enclaves de terceiros, lindando co perímetro exterior de cada unidade de superficie en couto redondo concentrada.
2. Nos proxectos de obras e melloras territoriais inherentes e complementarias á concentración parcelaria, as obras correspondentes realizaranse polas agrupacións solicitantes, podendo concederse axudas de ata o 70% do seu importe."

Artigo 16º.- *Reorganización dos instrumentos de xestión da Xunta de Galicia no eido do desenvolvemento rural.*

Un.- Autorízase o Consello da Xunta de Galicia a proceder á disolución, ao abeiro do previsto nos artigos 45 e seguintes da Lei 3/1985, de 12 de abril, de patrimonio da Comunidade Autónoma de Galicia, e nos artigos 360 e seguintes do Real decreto lexislativo 1/2010, do 2 de xullo, polo que se aproba o texto refundido da Lei de Sociedades de Capital, da Sociedade Anónima para o Desenvolvemento Comarcal de Galicia.

O patrimonio desta sociedade integrárase no patrimonio da comunidade autónoma, e quedará adscrito á Axencia Galega de Desenvolvemento Rural ou ao Instituto de Estudos do Territorio, de acordo co previsto na normativa aplicable en materia de patrimonio da Comunidade Autónoma galega.

O persoal que presta os seus servizos na Subdirección do Sistema de Información Territorial de Galicia baixo unha modalidade de contrato laboral indefinido, e fose seleccionado para a cobertura definitiva dun posto do Catálogo de Postos da sociedade aprobado pola sociedade co informe favorable Administración autonómica, baixo os principios de publicidade, mérito e capacidade, consonte o previsto na Lei 10/1996, do 5 de novembro, de actuación de entes e empresas nas que ten participación maioritaria a Xunta de Galicia ou, se é o caso, de acordo coa normativa vixente no momento da súa incorporación, terá a opción de integrarse e pasar a prestar servizos, baixo a mesma modalidade contractual e na mesma categoría profesional e nas restantes condicións laborais, no organismo autónomo de carácter administrativo Instituto de Estudos do Territorio, consonte a regulación prevista na alínea sete deste artigo.

O restante persoal, distinto do sinalado no parágrafo anterior, que presta os seus servizos na Sociedade Anónima para o Desenvolvemento Comarcal de Galicia baixo unha modalidade de contrato laboral indefinido, e fora seleccionado para a cobertura definitiva dun posto do Catálogo de Postos da sociedade aprobado pola sociedade co informe favorable Administración autonómica, baixo os principios de publicidade, mérito e capacidade consorte o previsto na Lei 10/1996, do 5 de novembro, de actuación de entes e empresas nas que ten participación maioritaria a Xunta de Galicia, ou, se é o caso, de acordo coa normativa vixente no momento da súa incorporación, terá a opción de integrarse e pasar a prestar servizos, baixo a mesma modalidade contractual e na mesma categoría profesional e nas restantes condicións laborais, na Axencia Galega de Desenvolvemento Rural consonte a regulación prevista no alínea sete deste artigo.

Dende o momento no que se produza a extinción da personalidade xurídica da sociedade anónima, a Axencia Galega de Desenvolvemento Rural ou o Instituto de Estudos do Territorio, en función das novas competencias atribuídas, subrogaranse en todos os dereitos e obrigas da sociedade anónima para o desenvolvemento comarcal de Galicia, así como dos que se deriven dos contratos nos que a dita sociedade fora parte, sen que esta subrogación poida reputarse como cesión de contratos.

Dous.- Autorízase o Consello da Xunta de Galicia a proceder á disolución, ao abeiro do previsto nos artigos 45 e seguintes da Lei 3/1985, de 12 de abril, de patrimonio da Comunidade Autónoma de Galicia, e nos artigos 360 e seguintes do Real Decreto Legislativo 1/2010, do 2 de xullo, polo que se aproba o texto refundido da Lei de Sociedades de Capital, da Sociedade Anónima Xestora do Banco de Terras de Galicia.

O patrimonio desta sociedade integrárase no patrimonio da Axencia Galega de Desenvolvemento Rural e estará destinado ao cumprimento dos fins establecidos na Lei 7/2007, do 21 de maio, de medidas administrativas e tributarias para a conservación da superficie agraria útil e do Banco de Terras de Galicia. A xestión, réxime xurídico e transmisión dos bens que integran este patrimonio rexirase polo disposto na referida Lei, sen prexuízo das adxudicacións que dese patrimonio realice a Axencia por decisión do órgano competente en materia de agricultura, como consecuencia do disposto na dita Lei e na Lei 10/1985, do 14 de agosto, de concentración parcelaria para Galicia.

O persoal que presta os seus servizos na Sociedade Anónima Xestora do banco de Terras de Galicia baixo unha modalidade de contrato laboral indefinido, e fora seleccionado para a cobertura definitiva dun posto do Catálogo de Postos da sociedade aprobado pola sociedade co informe favorable Administración autonómica, baixo os principios de publicidade, mérito e capacidade consonte o previsto na Lei 10/1996, do 5 de novembro, de actuación de entes e empresas nas que ten participación maioritaria a Xunta de Galicia, ou, se é o caso, de acordo coa normativa vixente no momento da súa incorporación, terá a opción de integrarse e pasar a prestar servizos, baixo a mesma modalidade contractual e na mesma categoría profesional e nas restantes condicións laborais, na Axencia Galega de

Desenvolvemento Rural consonte a regulación prevista na alínea sete deste artigo.

A Axencia Galega de Desenvolvemento Rural subrogarase en todos os dereitos e obrigas da sociedade anónima xestora do Banco de Terras de Galicia dende o momento no que se produza a extinción da personalidade xurídica da sociedade anónima así como dos que se deriven dos contratos nos que a dita sociedade fora parte, sen que esta subrogación poida reputarse como cesión de contratos.

Tres.- De conformidade co previsto no artigo 59 da Lei 12/2006, do 1 de decembro, de fundacións de interese galego, autorízase ao Consello da Xunta a extinguir as fundacións para o desenvolvemento das comarcas por imposibilidade de realizar o fin fundacional.

O acordo do Consello da Xunta polo que se autorice a extinción determinará a apertura do procedemento de liquidación conforme ao previsto no artigo 46 da Lei 12/2006, do 1 de decembro, de fundacións de interese galego.

Tralo remate das operacións de liquidación e previamente á inscrición no Rexistro de Fundacións de Interese Galego, o protectorado ratificará o acordo de extinción das anteditas fundacións.

Aos bens e dereitos resultantes da liquidación destas fundacións de desenvolvemento comarcal daráselles o destino previsto polo fundador ou decidido polo padroado cando teña recoñecida esta facultade nas respectivas cartas fundacionais, tendo en conta o disposto no artigo 45 da Lei 12/2006, do 1 de decembro, de fundacións de interese galego.

O persoal que, á entrada en vigor da presente Lei, preste os seus servizos nas Fundacións para o desenvolvemento das comarcas baixo unha modalidade de contrato laboral indefinido, e fora seleccionado baixo os principios de publicidade, mérito e capacidade, consorte o previsto na Lei 10/1996, do 5 de novembro, de actuación de entes e empresas nas que ten participación maioritaria a Xunta de Galicia ou, se é o caso, de acordo coa normativa vixente no momento da súa incorporación, terá a opción de integrarse e pasar a prestar servizos, baixo a mesma modalidade contractual e na mesma categoría profesional, en calquera dos organismos, sociedades ou entes adscritos ou con participación maioritaria da consellería competente en materia do medio rural segundo o previsto na alínea sete deste artigo.

O exercicio da opción pola integración do persoal das fundacións levará consigo a aceptación das condicións laborais e retributivas vixentes para cada categoría no organismo, sociedade ou ente ao que finalmente queden adscritos, sen vinculación ningunha ás condicións que con anterioridade tiveran na fundación que se extinga.

A Axencia Galega de Desenvolvemento Rural subrogarase na planificación, elaboración e execución dos programas en vigor aos que estean obrigadas as fundacións de desenvolvemento comarcal extinguidas.

Catro.- Facúltase á consellería competente en materia de facenda, por proposta da consellería competente en materia de desenvolvemento rural e, no seu caso, da de ordenación do territorio, a aprobar as modificacións orzamentarias previstas para levar a efecto o previsto nesta lei, incluídas as relativas aos orzamentos de explotación e capital das sociedades públicas e entidade e organismo autónomo afectados, e será de aplicación a excepción ás limitacións de transferencias de créditos relativa a reorganizacións administrativas prevista no artigo 68.3 do Decreto legislativo 1/1999, do 7 de outubro, polo que se aproba o texto refundido da Lei de réxime financeiro e orzamentario de Galicia.

Cinco.- As referencias previstas na normativa vixente ao Gabinete de Planificación e Desenvolvemento Territorial e á Sociedade Anónima para o desenvolvemento Comarcal de Galicia entenderanse efectuadas á Axencia Galega de Desenvolvemento Rural.

Seis.- As referencias previstas na Lei 7/2007, do 21 de maio, de medidas administrativas e tributarias para a conservación da superficie agraria útil e do Banco de Terras de Galicia e na Lei 10/1985, do 14 de agosto, de concentración parcelaria para Galicia e demais normativa vixente á Sociedade Anónima Xestora do Banco de Terras Galicia ou á sociedade Bantegal, entenderanse efectuadas á Axencia Galega de Desenvolvemento Rural.

Sete.- A aplicación do Convenio Colectivo da Xunta de Galicia ao persoal ao que se refire as alíneas un a tres deste artigo poderá regularse mediante Acordo do Consello da Xunta.

A integración na Administración xeral da Xunta de Galicia do persoal ao que se refire as alíneas un a tres deste artigo poderá regularse mediante decreto da Xunta de Galicia.

Artigo 17º.-Solo rústico protexido.

Un.- Modifícase o punto 2 do artigo 32 da lei 9/2002, de 30 de decembro, de ordenación urbanística e protección do medio rural de Galicia, que queda redactado como segue:

“2. Solo rústico especialmente protexido, constituído polos terreos que polos seus valores agrícolas, gandeiros, forestais, ambientais, científicos, naturais, paisaxísticos, culturais, suxeitos a limitacións ou servidumes para a protección do dominio público ou doutra índole deban estar sometidos a algún réxime especial de protección de acordo co disposto neste apartado.

Dentro deste tipo de solo rústico especialmente protexido distinguiranse as seguintes categorías:

- a) Solo rústico de protección agropecuaria, constituído polos terreos de alta produtividade agrícola ou gandeira, posta de manifesto pola existencia de explotacións que a avalen ou polas propias características ou potencialidade dos terreos ou zonas onde se enclaven, así como polo terreos obxecto de concentración parce-

laria a partir da entrada en vigor da Lei 9/2002 e polos terreos concentrados con resolución firme producida no dez anos anteriores a esta data, salvo que haxan de ser incluídos na categoría de solo rústico de protección forestal.

No entanto, o plan xeral poderá excluír xustificadamente desta categoría os ámbitos lindeiros sen solución de continuidade co solo urbano ou cos núcleos rurais que resulten necesarios para o desenvolvemento urbanístico racional, que serán clasificados como solo urbanizable ou incluído na delimitación dos núcleos rurais, respectivamente.

Excepcionalmente, a través dos procedementos previstos na lexislación de ordenación do territorio, poderán autorizarse, pola Consellería competente por razón do contido do proxecto, as actuacións necesarias para a implantación de infraestructuras, dotacións e instalacións nas que conorra unha causa de utilidade pública ou interese social que sexa prevalente a calquera outra preexistente .

- b) Solo rústico de protección forestal, constituído polos terreos destinados a explotacións forestais e os que sustenten masas arbóreas que deban ser protexidas por cumprir funcións ecolóxicas, produtivas, paisaxísticas, recreativas ou de protección do solo, e igualmente por aqueles terreos de monte que, aínda cando non sustenten masas arbóreas, deban ser protexidos por cumprir as ditas funcións e, en todo caso, polas áreas arbóreas formadas por especies autóctonas, así como por aquelas que sufrisen os efectos dun incendio a partir da entrada en vigor da presente lei ou nos cinco anos anteriores á mesma. Igualmente, considérase solo rústico de protección forestal aquelas terras que declare a administración competente como áreas de especial produtividade forestal e os montes públicos de utilidade pública. Excepcionalmente, o plan xeral poderá excluír desta categoría as áreas sen masas arboreados merecedores de protección, lindeiras sen solución de continuidade co solo urbano ou cos núcleos rurais, que resulten necesarios para o desenvolvemento urbanístico racional.

Excepcionalmente, a través dos procedementos previstos na lexislación de ordenación do territorio, poderán autorizarse, pola Consellería competente por razón do contido do proxecto, as actuacións necesarias para a implantación de infraestructuras, dotacións e instalacións nas que conorra unha causa de utilidade pública ou interese social que sexa prevalente a calquera outra preexistente."

Dous.- Modifícase o punto 2 do artigo 37 da lei 9/2002, de 30 de decembro, de ordenación urbanística e protección do medio rural de Galicia, que queda redactado como segue:

"2. Usos autorizables pola comunidade autónoma:

En solo rústico de protección agropecuaria serán autorizables os usos relacionados no apartado 1, letras d) e e), e no apartado 2, letras e), g) h), j), k) e l), do artigo 33º da presente lei, así como os que poidan establecerse a través dos instrumentos previstos na lexislación de ordenación do territorio.

En solo rústico de protección forestal poderán autorizarse os usos relacionados no apartado 1, letras d) e e), e no apartado 2, letras e), g), h), j), k) e l), do artigo 33º, sempre que non leven a transformación urbanística do solo nin lesionen os valores obxecto de protección e os que poidan establecerse a través dos instrumentos de ordenación do territorio. Nos montes públicos de utilidade pública serán autorizables os usos admitidos na súa lexislación sectorial.

En solo rústico de protección de infraestruturas unicamente serán autorizables os usos vinculados funcionalmente á infraestrutura correlativa, así como os que poidan establecerse a través dos instrumentos de ordenación do territorio”.

Artigo 18º.-Proxectos sectoriais de parcelación urbanística.

Modifícase o punto 7 do artigo 23 da Lei 10/1995, de 23 de novembro, de Ordenación del Territorio de Galicia, que queda redactado como segue:

“7. Os proxectos sectoriais que impliquen a transformación e parcelación urbanística do solo deberán conter, ademais das determinacións esixidas neste artigo, as que se indican no artigo 66 da Lei 9/2002, do 30 de decembro, de Ordenación Urbanística e Protección do Medio Rural de Galicia. Cando ditos proxectos afecten a terreos que, de conformidade coa lexislación urbanística, deban ser clasificados como solo rústico de especial protección, esixirase o informe favorable do Organismo que ostente a competencia sectorial por razón do correlativo valor a protexer.”

III.3. CAPÍTULO III Función pública

Artigo 19º.-Selección do persoal laboral.

Modifícase o punto 2 do artigo 10 do texto refundido da lei da función pública de Galicia, aprobado polo Decreto legislativo 1/2008, do 13 de marzo, que queda redactado como segue:

“2. A selección do persoal laboral efectuarase de acordo coa oferta de emprego público, mediante convocatoria pública e a través do sistema de oposición, de concurso ou de concurso-oposición libre en que se garantan, en todo caso, os principios constitucionais de igualdade, mérito, capacidade e publicidade, sen prexuízo do disposto na alínea 1 do artigo 37 da Lei 7/2004, do 16 de xullo, para a igualdade de mulleres e homes.

Cando o sistema de acceso sexa o de concurso, nas convocatorias establecerase unha puntuación mínima para superalo. En ningún caso, o número de seleccionados poderá exceder do número de prazas convocadas.

Nos sistemas selectivos que se celebren por concurso ou concurso-oposición e en relación cos procesos extraordinarios de consolidación de emprego establecidos para o persoal laboral da Xunta de Galicia, serán obxecto de especial valoración os servizos prestados na Xunta de Galicia no grupo e categoría ao que se acceda."

Artigo 20º.-Postos de traballo de libre designación.

Modifícase o artigo 30 do texto refundido da lei da función pública de Galicia, aprobado polo Decreto Legislativo 1/2008, do 13 de marzo, que queda redactado como segue:

"Artigo 30

Proveranse polo sistema de libre designación, con convocatoria pública entre persoal funcionario de carreira, os postos de traballo de carácter directivo ou de especial responsabilidade e aqueles que requiran unha confianza persoal para exercer as súas funcións. En todo caso, mediante este procedemento, proveranse as subdireccións xerais ou equivalentes, xefaturas de servizo ou equivalentes, as secretarías de altos cargos, así como, excepcionalmente outros de nivel inferior que, como tales, se determinen nas relacións de postos de traballo, segundo os criterios que se establezan, neste último caso, previa negociación coas organizacións sindicais.

Os postos clasificados como de libre designación estarán sometidos a dispoñibilidade horaria nos termos que se establezan regulamentariamente."

Artigo 21º.-Plan de ordenación de recursos humanos.

Engádesse o artigo 30 bis ao texto refundido da lei da función pública de Galicia, aprobado polo Decreto Legislativo 1/2008, do 13 de marzo, co seguinte contido:

"Artigo 30 bis

1. A Xunta de Galicia no marco da planificación xeral dos seus recursos humanos, e sen prexuízo do dereito dos funcionarios á mobilidade, poderá trasladar motivadamente ao persoal funcionario de carreira a consellerías, unidades, organismos, axencias ou entidades distintos aos do seu destino, cando considere que existen sectores prioritarios da actividade pública con necesidades específicas de efectivos.
 2. Este traslado, de carácter voluntario, levarase a cabo mediante comisión de servizos, atribuíndolle ao persoal funcionario, ou ben, un posto de traballo distinto ao de orixe, para o que reúna os requisitos establecidos na relación de postos de traballo, ou ben, funcións ou tarefas propias da súa condición profesional que, por motivo de maior volume ou razóns coxunturais, non poidan ser atendidas con suficiencia polo persoal que preste servizos nas unidades sinaladas no apartado 1 do presente artigo.
- Nestes casos percibiranse as retribucións do posto de traballo que realmente desempeñe, ou as do posto de orixe, no caso de que dita comisión sexa por atribución

de tarefas.

Esta comisión de servizos terá unha duración de 6 meses, prorrogable excepcionalmente por outros seis meses, no caso de que se manteñan as necesidades de servizo ou funcionais. Os postos de traballo vacantes, cubertos temporalmente por esta comisión de servizos, incluíranse nos correspondentes concursos de traslados.

3. Cando as necesidades de servizo ou funcionais xustifiquen a modificación da adscripción dos postos de traballo a unha consellería, unidade, organismo, axencia ou entidade distinta da que figure na relación de postos de traballo, aprobarase un plan de ordenación de recursos humanos polo consello da Xunta de Galicia, logo da negociación sindical, oída a comisión de persoal, previo informe da consellería competente en materia de función pública e da consellería competente en materia de orzamentos."

Artigo 22º.-Valoración de méritos nos procesos selectivos.

Modifícase o punto 2 do artigo 38 do texto refundido da lei da función pública de Galicia, aprobado polo Decreto Lexislativo 1/2008, do 13 de marzo, que queda redactado como segue:

"2. A valoración dos devanditos méritos ou niveis de experiencia non suporá máis dun corenta por cento da puntuación máxima alcanzable no proceso selectivo. Co fin de asegurar a debida idoneidade das persoas aspirantes, estas deberán superar na fase de oposición a puntuación mínima establecida para as respectivas probas selectivas."

Artigo 23º.-Rehabilitación da condición de persoal funcionario.

Engádesse un novo artigo 50 bis ao texto refundido da lei da función pública de Galicia, aprobado polo Decreto Lexislativo 1/2008, do 13 de marzo, co seguinte contido:

"Artigo 50 bis

1. Nos casos de extinción da relación de servizo como consecuencia de perda da nacionalidade ou de xubilación por incapacidade permanente para o servizo, a persoa interesada, unha vez desaparecida a causa obxectiva que a motivou, pode solicitar a rehabilitación da súa condición de persoal funcionario, que lle será concedida.
Se a rehabilitación se producise antes de que transcorran dous anos dende a extinción da relación de servizo como consecuencia de xubilación por incapacidade permanente para o servizo, o persoal funcionario reincorporarase ao último posto de traballo que ocupase con carácter definitivo, o cal lle quedará reservado durante ese período de tempo.
2. O Consello da Xunta de Galicia, oída a Comisión de persoal, poderá conceder, con carácter excepcional e a solicitude da persoa interesada, a rehabilitación de quen perdese a condición de persoal funcionario por condena á pena principal ou acceso-

ria de inhabilitación, atendendo ás circunstancias e entidade do delito cometido. Se a resolución non se dictase de forma expresa e se notificase á persoa interesada no prazo de tres meses, a solicitude de rehabilitación poderase entender desestimada."

Artigo 24º.-Excedencia por prestación de servizos no sector público.

Modifícase o punto 1 do artigo 57 do texto refundido da lei da función pública de Galicia, aprobado polo Decreto Lexislativo 1/2008, do 13 de marzo, que queda redactado como segue:

"1. Excedencia por prestación de servizos no sector público:

Sen prexuízo do disposto na normativa sobre incompatibilidades, procede declarar, de oficio ou a solicitude da persoa interesada, na situación de excedencia por prestación de servizos no sector público:

- a) Ao persoal funcionario de carreira que acceda, por promoción interna ou por outros sistemas de acceso, a outros corpos ou escalas en calquera Administración Pública e non lle corresponda quedar noutra situación administrativa.
- b) Ao persoal funcionario de carreira que pase a prestar servizos como persoal laboral fixo en calquera Administración Pública o en organismos, axencias ou entidades do sector público. Para estes efectos, considéranse incluídas no sector público as sociedades mercantís e fundacións que reúnan os requisitos esixidos pola lexislación aplicable segundo a Administración Pública á que estean vinculadas ou da que dependan.

A excedencia regulada neste apartado non é aplicable ao persoal funcionario de carreira que pase a prestar servizos en calquera Administración Pública, organismo, axencia ou entidade do sector público como persoal funcionario interino ou como persoal laboral con contrato temporal ou declarado indefinido por sentenza xudicial firme, nin ao que pase a prestar servizos en entidades que queden excluídas da consideración de sector público para os efectos do previsto na alínea b) do presente apartado.

Nestes supostos, o persoal funcionario de carreira será declarado na situación de excedencia por interese particular, sen que lle sexa esixible o requisito de ter prestado un tempo mínimo de servizos previos nin o prazo de permanencia na mesma.

As persoas que se atopen en situación de excedencia por prestación de servizos no sector público non devengarán retribucións, nin será computable o tempo que permanezan na mesma a efectos de ascensos, trienios e dereitos no réxime de Seguridade Social que sexa de aplicación.

Malia o disposto no parágrafo anterior, no suposto regulado na alínea b) desta apartado, o tempo de servizos prestados en organismos, axencias ou entidades do sector públi-

co computarase aos solos efectos de antigüidade, unha vez se reingrese ao servizo activo."

Artigo 25º.-Excedencia por razón de violencia de xénero.

Modifícase o punto 6 do artigo 57 do texto refundido da lei da función pública de Galicia, aprobado polo Decreto Lexislativo 1/2008, do 13 de marzo, que queda redactado como segue:

"6. Excedencia por razón de violencia de xénero:

As funcionarias vítimas de violencia de xénero, para facer efectiva a súa protección ou o seu dereito á asistencia social integral, teñen dereito a solicitar a situación de excedencia sen que sexa esixible o requisito de ter prestado un tempo mínimo de servizos previos nin un prazo de permanencia na mesma.

Durante os seis primeiros meses de permanencia nesta situación tense dereito á reserva do posto de traballo que se desempeñase, computándose o devandito período a efectos de antigüidade, carreira e dereitos do réxime de Seguridade Social que resulte de aplicación. Cando as actuacións xudiciais así o esixan, este período prorrogarase por prazos de tres meses, ata un máximo total de dezaioito, con idénticos efectos aos sinalados anteriormente, co fin de garantir a efectividade do dereito de protección da vítima.

Durante os tres primeiros meses da excedencia regulada neste artigo a funcionaria ten dereito a percibir as súas retribucións íntegras e, se é o caso, as prestacións familiares por filla ou fillo ao seu cargo."

Artigo 26º.-Adscrición provisional por reingreso ao servizo activo.

Modifícase o punto 3 do artigo 61 do texto refundido da lei da función pública de Galicia, aprobado polo Decreto Lexislativo 1/2008, do 13 de marzo, que queda redactado como segue:

"3. O posto asignado con carácter provisional convocarase para a súa provisión definitiva no prazo máximo dun ano, no caso de estar vacante, e a persoa funcionaria reingresada terá a obriga de participar nos concursos de traslados que se convoquen, para todos os postos de traballo do seu corpo ou escala da localidade onde estivera adscrito provisionalmente. Se non obtivese destino definitivo, quedará ao dispor do conselleiro/a, procedéndose a súa adscrición provisional a un posto de traballo correspondente ao seu corpo e/ou escala, polo órgano competente."

Artigo 27º.-Cese nun posto de traballo provisto por libre designación ou por alteración do contido ou supresión do posto.

Modifícase o punto 4 do artigo 65 do texto refundido da lei da función pública de

Galicia, aprobado polo Decreto Lexislativo 1/2008, do 13 de marzo, que queda redactado como segue:

“4. As persoas funcionarias que cesen nun posto de traballo sen obter outro polos sistemas de provisión previstos no artigo 29 desta lei, quedarán ao dispor do/a conselleiro/a que procederá á súa adscrición provisional a un posto de traballo correspondente ao seu corpo e/ou escala, na mesma localidade da do posto que viña desempeñando con carácter definitivo, garantíndolle, en todo caso, as retribucións que lle correspondan polo seu grao persoal consolidado e un complemento específico non inferior en máis de dous niveis ao do dito grao. A Consellería competente en materia de función pública autorizará esta adscrición cando implique cambio de consellería ou de localidade, coa conformidade, neste último caso, do persoal funcionario afectado.

Sen prexuízo do disposto no parágrafo anterior, quen cese nun posto provisto por libre designación ou por alteración do contido ou supresión do seu posto definitivo na relación de postos de traballo, mentres non obteña outro posto con carácter definitivo, e durante un prazo máximo de tres meses, percibirá, en todo caso, as retribucións complementarias correspondentes ao posto que viña desempeñando con carácter definitivo.

O persoal funcionario ao dispor do/a conselleiro/a ou adscrito provisionalmente a un posto de traballo está obrigado a participar nos concursos de provisión que se convoquen para postos adecuados ao seu corpo e/ou escala, e a solicitar, á súa elección, todos os postos situados na localidade da do posto que tivese ocupado con carácter definitivo, ou ben, na localidade onde estivera adscrito provisionalmente. O incumprimento das obrigas establecidas neste parágrafo determinará a declaración da situación de excedencia voluntaria por interese particular.

Nos concursos de traslados, computarase o período de tempo nesta situación, de ser o caso, como se se desempeñase un posto inferior en dous niveis ao do grao persoal consolidado, dende o día seguinte ao do cesamento do posto que ocupase con carácter definitivo e de acordo co que dispoñan as bases da convocatoria.”

Artigo 28º.-Reserva do posto para o persoal funcionario docente.

Modifícase o artigo 66 do texto refundido da lei da función pública de Galicia, aprobado polo Decreto Lexislativo 1/2008, do 13 de marzo, que queda redactado como segue:

“ Artigo 66.

Nos supostos de provisión polo procedemento de libre designación de postos de traballo abertos a persoal funcionario docente nas relacións de postos de traballo, calquera que sexa o corpo docente ao que pertenza, ou do corpo de inspectores ao servizo da administración educativa, estas clases de persoal terán dereito á reserva do posto de traballo docente ou de función inspectora de procedencia, sempre que o ocupasen con

carácter definitivo.”

Artigo 29º.-*Réxime retributivo.*

Modifícase a letra b) do punto 2 do texto refundido da lei da función pública de Galicia, aprobado polo Decreto Legislativo 1/2008, do 13 de marzo, que queda redactado como segue:

“b) Os trienios, que consisten nunha cantidade, que será igual para subgrupo ou grupo de clasificación profesional, no suposto de que este non teña subgrupo, por cada tres anos de servizo no corpo ou escala.

Nos casos nos que o persoal funcionario preste servizos sucesivamente en diferentes corpos ou escalas de distinto subgrupo ou grupo de clasificación, terá dereito a seguir percibindo os trienios derivados da pertenza aos subgrupos ou grupos anteriores. Asemade, cando o persoal funcionario cambie de adscrición de subgrupo ou grupo antes de completar un trienio, a fracción de tempo transcorrido considerase como tempo de servizos prestados no novo subgrupo ou grupo.

O persoal interino da Xunta de Galicia que acceda á condición de persoal funcionario en prácticas e/ou de carreira, terá dereito a seguir percibindo os trienios que teña recoñecidos como persoal interino ou en prácticas.”

Artigo 30º.-*Modificación da disposición adicional décimo sétima do texto refundido da lei de función pública de Galicia.*

Modifícase a Disposición Adicional décimo sétima do texto refundido da lei da función pública de Galicia, aprobado polo Decreto Legislativo 1/2008, do 13 de marzo, que queda redactado como segue:

“O persoal funcionario de carreira que, a partir da entrada en vigor da Lei orgánica 1/1981, do 6 de abril, pola que se aprobou o Estatuto de autonomía para Galicia, desempeñe ou tivese desempeñado durante máis de dous anos continuados ou tres con interrupción cargos públicos incluídos no ámbito de aplicación da Lei de incompatibilidades de altos cargos da Administración Autonómica, exceptuados os de persoal eventual, agás os xefes/as de gabinete do Presidente e dos membros do Consello da Xunta de Galicia, percibirá desde a súa reincorporación ao servizo activo e mentres se manteña esta situación, o complemento de destino correspondente ao posto de traballo que desempeñen ou, se é o caso, ao do seu grao persoal, incrementado na cantidade necesaria para igualalo ao valor do complemento de destino, ou concepto equivalente que a Lei de orzamentos xerais do Estado fixe para as directoras e os directores xerais, e a suma de ambos os conceptos non poderá ser inferior ao importe do complemento de destino que perciban as persoas funcionarias que acrediten o nivel máximo establecido legalmente.”

Artigo 31º.-*Novas disposicións adicionais do texto refundido da lei de función pública de Galicia.*

Un.- Engádesse unha nova Disposición adicional ao texto refundido da lei da función pública de Galicia, aprobado polo Decreto Legislativo 1/2008, do 13 de marzo, co seguinte contido:

“Vixésima.

A Consellería competente en materia de Función Pública procederá de oficio a modificación das relacións de postos de traballo derivadas do cambio no sistema de provisión dos postos de traballo das xefaturas de servizo ou postos equivalentes pola aplicación do disposto no artigo 30 do Decreto legislativo 1/2008, do 13 de marzo, polo que se aproba o texto refundido da Lei da Función Pública de Galicia.”

Dous.- Engádesse unha nova Disposición adicional ao texto refundido da lei da función pública de Galicia, aprobado polo Decreto Legislativo 1/2008, do 13 de marzo, co seguinte contido:

“Vixésimo Primeira.

O persoal laboral fixo que estea desempeñando postos de traballo ou realice funcións de persoal funcionario, e que así se determine nas relacións de postos de traballo que serán aprobadas polo Consello da Xunta, logo da súa valoración, clasificación e determinación, será obxecto do correspondente proceso selectivo de promoción interna, convocados de forma independente, aos procesos selectivos de libre concurrencia naqueles corpos da Administración da Xunta de Galicia, aos que figuren adscritos as funcións ou os postos que desempeñen.

Este persoal deberá posuír a titulación necesaria e reunir os restantes requisitos esixidos, valorándose a estes efectos como mérito, os servizos efectivos prestados como persoal laboral fixo e as probas selectivas superadas para acceder a esta condición.

Ao persoal que supere este proceso selectivo adxudicaráselle destino no mesmo posto que viña desempeñando con carácter definitivo, adquirindo a condición de persoal funcionario de carreira.”

Artigo 32º.-*Nova disposición transitoria do texto refundido da lei de función pública de Galicia.*

Engádesse unha nova Disposición transitoria ao texto refundido da lei da función pública de Galicia, aprobado polo Decreto Legislativo 1/2008, do 13 de marzo, co seguinte contido:

“Décimo quinta.

O persoal funcionario da Administración do Estado, das comunidades autónomas e das corporacións locais que no momento da entrada en vigor desta disposición se atope ocupando un posto con carácter definitivo nesta Administración en virtude dos sistemas de provisión de concurso ou de libre designación establecidos no artigo 29 desta lei, ou ben se atope na situación prevista no artigo 65.4 desta lei, por ter sido cesado nun posto provisto por libre designación ou por alteración do contido ou supresión do posto, que ocupasen con carácter definitivo, se integrará no correspondente corpo ou escala desta Administración, con efectos da entrada en vigor desta disposición.”

Artigo 33º.-Escala de axentes facultativos medioambientais.

Modifícase a Disposición Transitoria Primeira da Lei 2/2000, do 21 de decembro, pola que se crea a escala de axentes facultativos medioambientais da Xunta de Galicia, que queda redactada como segue:

O persoal funcionario de carreira pertencente á escala de axentes forestais do corpo de auxiliares técnicos da Xunta de Galicia, sempre que cumpra os requisitos de acceso establecidos na disposición adicional vixésimo segunda da Lei 30/1984, de 2 de agosto, de medidas para a reforma da función pública, poderá integrarse na escala de axentes facultativos medioambientais. O curso específico de formación a que se refire esta disposición adicional estará homologado e impartido directamente por persoal cualificado das administracións públicas.

Para tal efecto, computaranse como servizos na escala os desempeñados en calidade de persoal interino na Xunta de Galicia en postos reservados á escala de axentes forestais.

A Xunta de Galicia convocará un máximo de catro procesos selectivos de promoción que permita acceder á escala de axentes facultativos medioambientais ao persoal que, sendo funcionario nese momento, os supere, establecéndose como límite temporal para a convocatoria o ano 2013.

O persoal funcionario, que en virtude destes procesos acceda á escala superior, continuará adscrito aos postos de traballo que viñesen desempeñando con carácter definitivo no momento da súa integración.”

III.4. CAPÍTULO IV. Medidas en materia de contratación

Artigo 34º.-Reserva de contratos a centros especiais de emprego e empresas de inserción sociolaboral.

Un.- De conformidade co que se dispón no presente artigo os órganos de contratación da Administración da Comunidade Autónoma de Galicia e os demais entes do sector público dela dependentes poderán reservar a participación en determinados procedementos de adxudicación de contratos, a Centros Especiais de Emprego e Empresas de Inserción laboral, sempre que a súa finalidade ou a súa actividade, de acordo coas súas normas reguladoras, estatutos ou regras fundacionais, teña relación directa co obxecto do contrato.

Dous.- Os obxectos contractuais susceptibles de reserva serán as obras e servizos de conservación e mantemento de bens inmobles, os servizos de conserxería, mensaxería e correspondencia, servizos de xardinería e forestal, de artes gráficas, de limpeza e lavandaría, de restauración, de recollida e transporte de residuos, fabricación de roupa de traballo e servizos e subministracións auxiliares para o funcionamento do sector público. Os órganos de contratación poderán ampliar a reserva a outros obxectos contractuais atendendo a súa adecuación as prestacións dos centros e empresas a que se refire o presente artigo.

A reserva deberá mencionarse no título do contrato e no anuncio de licitación ou invitación.

Tres.- O importe global dos contratos reservados será determinado por cada entidade cun límite do 3% do importe dos contratos adxudicados no exercicio orzamentario inmediatamente anterior mediante contratos menores ou procedementos negociados por razón da contía.

Catro.- As empresas e entidades beneficiarias da reserva deberán estar legalmente constituídas e inscritas nos respectivos rexistros oficiais da Comunidade Autónoma de Galicia:

- As Empresas de Inserción deberán estar rexistradas conforme ao Decreto 156/2007, do 19 de xullo, que regula o procedemento de cualificación das empresas de inserción laboral, crea o seu rexistro e establece as medidas para o fomento da inserción sociolaboral.

- Os Centros Especiais de Emprego deberán estar legalmente constituídos e rexistrados conforme ao Decreto 200/2005 do 7 de xullo polo que se regula a autorización administrativa e a inscrición non Rexistro Administrativo de Centros Especiais de Emprego de Galicia, e a súa organización e funcionamento.

Así mesmo, deberán encontrarse inscritas no Rexistro de Contratistas regulado polo Decreto 262/2001, do 20 de setembro, polo que se refunde a normativa reguladora do Rexistro Xeral de Contratistas da Comunidade Autónoma de Galicia.

Cinco.- Os contratos reservados deben someterse ao réxime xurídico establecido pola normativa vixente reguladora da contratación pública.

A reserva a Centros Especiais de Emprego, cando polo menos o 70 por 100 das persoas traballadoras sexan persoas con discapacidade, poderá aplicarse a procedementos sen límite de contía.


No caso de empresas de inserción laboral a reserva aplicarase exclusivamente a través de contratos menores ou procedementos negociados por razón da contía, de conformidade co que se establece nos artigos 122.3 e 161.2 da Lei 30/2007, de 30 de outubro, de contratos do sector público.

Prohíbese expresamente o fraccionamento do obxecto de contrato.

Seis.- As empresas e entidades beneficiarias da reserva están exentas da presentación de garantías provisionais ou definitivas nos procedementos convocados ao amparo desta disposición.

Artigo 35º.-*Creación dun órgano colexiado independente para o coñecemento e a resolución dos recursos especiais en materia de contratación.*

Autorízase ó Consello da Xunta para que, por proposta da Consellería de Facenda e respectando a lexislación estatal básica, cree un órgano colexiado independente para o coñecemento e a resolución das cuestións de nulidade formuladas e dos recursos especiais en materia de contratación que se interpoñan en relación cos procedementos de contratación da Administración Xeral da comunidade autónoma e das entidades que integran o sector público autonómico, así como, das corporacións locais de Galicia e entidades delas dependentes. A creación deste órgano non poderá supoñer incremento do gasto público.



DISPOSICIÓN TRANSITORIA

IV. DISPOSICIÓN TRANSITORIA


Única.-*Réxime das condicións laborais do persoal afectado pola reorganización dos instrumentos de xestión da Xunta de Galicia no eido do desenvolvemento rural.*

Un.- Sen prexuízo do disposto na alínea sete do artigo 16 desta lei e en tanto non se desenvolva, se é o caso, a negociación colectiva que estableza o réxime aplicable ao persoal da Axencia Galega de Desenvolvemento Rural afectado pola reestruturación, este rexerase polas seguintes condicións laborais:

- a) O persoal procedente da Sociedade Anónima para o desenvolvemento Comarcal de Galicia e da Sociedade Anónima Xestora do banco de Terras Galicia que opte pola integración manterá as mesmas condicións laborais e salariais das que gozaba nas ditas sociedades.
- b) O persoal da Axencia Galega de Desenvolvemento Rural mantense estritamente as persoas nas condicións particulares que, con carácter global e en cómputo anual, excedan do conxunto de condicións do persoal integrado e veñan derivadas de normas preexistentes ou acordadas colectivamente.

Dous.- Sen prexuízo do disposto na alínea sete do artigo 16 desta lei, o persoal incorporado ao Instituto de Estudos do Territorio procedente da extinta sociedade manterá as mesmas condicións laborais e salariais das que gozaba na dita sociedade.

Tres.- Ao persoal procedente das Fundacións para o desenvolvemento das comarcas que opte pola integración se lle aplicarán as condicións previstas na alínea tres do artigo 16 desta lei.



DISPOSICIÓN DERROGATORIA


V. DISPOSICIÓN DERROGATORIA

Única.-

Un.- Queda derrogado o artigo 30 e o punto 21 do artigo 2 da Lei 3/2007, de 9 de abril, de prevención e defensa contra os incendios forestais de Galicia.

Dous.- Quedan derrogadas as disposicións adicionais primeira e segunda e a disposición transitoria da Lei 12/2008, do 3 de decembro, pola que se modifican a Lei 7/1996, do 10 de xullo, de desenvolvemento comarcal, e a Lei 5/2000, do 28 de decembro, de medidas fiscais e de réxime orzamentario e administrativo, e se racionalizan os instrumentos de xestión comarcal e de desenvolvemento rural.

Tres.- Queda derrogada a disposición adicional terceira da Lei 2/1988, do 5 de marzo, de orzamentos xerais da Comunidade Autónoma de Galicia para 1988.



DISPOSICIÓN DERRADEIRAS

VI. DISPOSICIÓNS DERRADEIRAS

Primeira.-*Modificación da Lei 8/2009, polo que se regula o aproveitamento eólico en Galicia e se crean o canon eólico e o Fondo de Compensación Ambiental.*

Un.- Modifícase o artigo 25 da Lei 8/2009, polo que se regula o aproveitamento eólico en Galicia e se crean o canon eólico e o Fondo de Compensación Ambiental, que queda redactado como segue:

“ Artigo 25º.-Destino.

1. O Fondo de Compensación Ambiental estará afectado á realización, nos termos previstos nos puntos seguintes, de gastos nos entes locais que revistan natureza produtiva e xeradora de emprego.

Non obstante, a lei anual de orzamentos poderá establecer criterios específicos de afectación do fondo de compensación ambiental, sempre e cando a súa aplicación non comprometa máis do 50% da dotación correspondente aos recursos anuais, e consista na súa vinculación ao financiamento de actuacións comprendidas en aplicacións orzamentarias que teñan entre as súas finalidades, a protección do medio e do contorno natural, a súa conservación, reposición e restauración, así como o fomento da investigación dirixida á mellora na eficiencia do aproveitamento dos recursos das enerxías renovables.

2. Unha vez aplicado o disposto no punto anterior, a maior parte da contía dispoñible do fondo para cada exercicio, no importe que se fixe a través da orde reguladora, destinarase as entidades cuxo termo municipal se atope dentro da poligonal de delimitación dun parque eólico ou resulten afectados polas correspondentes instalacións de conexión para a realización de:
 - a) Actuacións orientadas á conservación da biodiversidade, ao coñecemento e á utilización recreativa e didáctica dos recursos naturais e á recuperación do medio natural degradado ou contaminado.
 - b) Actuacións de impulso da eficiencia e utilización sustentable das enerxías renovables.
3. Os custos elixibles para efectos de distribución do fondo son os seguintes:
 - a) Investimentos en inmovilizado: custo de man de obra externa, execución material, equipos e instalacións.
 - b) Custos de proxecto e dirección de obra se se trata de contratacións externas.
4. A cantidade asignada a cada proxecto destinarase en función do orzamento de execución material presentado pola entidade local solicitante e non poderá superar o 100% do dito orzamento.
5. A distribución anual do fondo regularase mediante orde ditada pola consellería com-

petente en materia de réxime local, na que tamen establecerase os criterios de reparto, os entes locais beneficiarios e as actuacións ás que se destinará a parte do fondo que non estivera comprendida no punto 2 deste artigo, que terán que estar dirixidas á protección do medio ambiente, incluídas aquelas que teñan por obxecto a prevención, extinción e xestión de situacións de sinistro ou risco."

Dous.- Engádese unha nova disposición adicional segunda na Lei 8/2009, do 22 de decembro, pola que se regula o aproveitamento eólico en Galicia e se crean o canon eólico e o Fondo de Compensación Ambiental, co seguinte contido:

"Segunda.

Creación da Comisión de Seguimento da execución dos proxectos de desenvolvemento de natureza industrial asociados aos parques eólicos adxudicados dentro das ordes de convocatoria que regula esta lei.

Co fin de levar a cabo o seguimento da execución dos proxectos de desenvolvemento de natureza industrial asociados aos parques eólicos adxudicados dentro das ordes de convocatoria que regula esta lei, créase unha comisión de seguimento e control, que garanta o execución das actuacións polas que os proxectos eólicos foron seleccionados.

A comisión de seguimento e control estará integrada por seis membros, ostentará a presidencia o representante da dirección xeral con competencias en materia de enerxía que nomeará aos cinco membros restantes.

A concreción dos fins da comisión, a súa organización e funcionamento desenvólvese regulamentariamente mediante Orde da Consellería con competencia en materia de enerxía.

A constitución e a posta en funcionamento desta comisión non suporá incremento do gasto público."

Segunda.-*Modificación da Lei 6/2001, do 29 de xuño, de adecuación da normativa da Comunidade Autónoma de Galicia á Lei 4/1999, do 13 de xaneiro, de modificación da Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común.*

Engádese ao anexo II da Lei 6/2001, do 29 de xuño, de adecuación da normativa da Comunidade Autónoma de Galicia á Lei 4/1999, do 13 de xaneiro, de modificación da Lei 30/1992, do 26 de novembro, de Réxime Xurídico das Administracións Públicas e do Procedemento Administrativo Común, dentro dos procedementos da Consellería de Sanidade (Servizo Galego de Saúde), o seguinte texto:

"Tipos de procedementos: solicitudes, reclamacións ou recursos en materia de persoal, con contido retributivo, formulados polos profesionais do Servizo Galego de Saúde,

que teñan repercusión no capítulo I dos estados de gastos dos orzamentos das institucións sanitarias do organismo.

Sentido do silencio: Negativo.

Normativa reguladora:

- Lei 55/2003, do 16 de decembro, do Estatuto Marco do Persoal Estatutario do Servizo de Saúde.

- Lei Estatal 7/2007, do 12 de abril, do Estatuto Básico do Empregado Público.

- Lei 8/2008, do 10 de xullo, de saúde de Galicia.

- Real Decreto-Lei 3/1987, do 11 de setembro, sobre retribucións do persoal estatutario do Instituto Nacional da Saúde.

- Decreto 226/1996, do 25 de abril, polo que se regula o réxime retributivo do persoal das unidades e servizos de atención primaria; modificado polo Decreto 156/2005, do 9 de xuño.

- Orde Estatal do 8 de agosto de 1986, pola que se fixan as retribucións do persoal dependente do Instituto Nacional da Saúde, Instituto Catalá da Saúde e Rede Sanitaria da Seguridade Social de Andalucía; modificada pola Orde do 4 de decembro de 1986.

- Real Decreto 1146/2006, do 6 de outubro, polo que se regula a relación laboral especial de residencia para a formación de especialistas en Ciencias da Saúde.

- Orde do 4 de xuño de 2008, pola que se publican determinados acordos sobre ordenación e provisión de postos de traballo e condicións de traballo e retributivas no ámbito da atención primaria do Servizo Galego de Saúde.

- Resolución do 1 de marzo de 2001, pola que se ordena a publicación do acordo de concertación social sobre retribucións e condicións de traballo do persoal sanitario non facultativo e persoal non sanitario do Servizo Galego de Saúde.

- Resolución do 18 de novembro de 2003, pola que se ordena a publicación do acordo sobre mellora retributiva e profesional do persoal das institucións sanitarias do Servizo Galego de Saúde.

- Orde do 1 de decembro de 2008 pola que se publica o acordo 2008-2012 para a mellora das condicións de traballo e retributivas do persoal estatutario do Servizo Galego de Saúde.

- Decreto 155/2005, do 9 de xuño, sobre un réxime extraordinario de recoñece-

mento do desenvolvemento profesional do persoal estatutario das categorías de licenciados sanitarios do Servicio Galego de Saúde previo á implantación do réxime de desenvolvemento profesional a que se refire a Lei 44/2003, do 21 de novembro, de ordenación das profesións sanitarias.

- Resolución do 28 de xullo de 2006, pola que se ordena a publicación do acordo polo que se regula o acceso extraordinario á carreira profesional do persoal diplomado sanitario e as bases de negociación do réxime definitivo de carreira profesional.

- Resolución do 25 de outubro de 2007, pola que se ordena a publicación do acordo polo que se regula o acceso extraordinario á carreira profesional do persoal das categorías de xestión e servizos e sanitarias de formación profesional con vínculo estatutario fixo nas institucións sanitarias do Servizo Galego de Saúde.

- Orde do 24 de maio de 2006 pola que se desenvolve o procedemento para o recoñecemento da consolidación de grao persoal para determinadas categorías de persoal estatutario fixo.

- Orde do 16 de abril de 2008 pola que se regula o procedemento de recoñecemento de trienios ao persoal estatutario temporal do Servizo Galego de Saúde”.

Terceira.-*Modificación da Lei 5/2000, do 28 de decembro, de medidas fiscais e de réxime orzamentario e administrativo.*

Un.- Modifícase o punto un da disposición adicional sexta da Lei 5/2000, do 28 de decembro, de medidas fiscais e de réxime orzamentario e administrativo, que queda redactado como segue:

“Un.- Créase a Axencia Galega de Desenvolvemento Rural como un ente de dereito público con personalidade xurídica propia, que adecúan a súa actividade ao dereito privado.

Este ente será o instrumento básico de actuación da Xunta de Galicia no fomento e na coordinación do desenvolvemento do territorio rural galego, para mellora-las condicións de vida e evita-lo despoboamento dese territorio, posibilitando a creación e ampliación de explotacións agrarias e gandeiras en canto que actividades produtivas relevantes no medio rural galego, mediante a xestión do Banco de Terras de Galicia.

Así mesmo este ente será o órgano competente en materia de desenvolvemento comarcal, exercendo como instrumento básico de actuación da Xunta de Galicia para a o deseño, aplicación, coordinación e seguimento do Plan de desenvolvemento comarcal, e encargándose a súa vez da tarefa dinamización comarcal, a través dos centros de desenvolvemento comarcal dependentes da Xunta de Galicia.

Este ente adscríbese á consellería competente en materia de desenvolvemento rural"

Dous.- Engádense ao punto Dous da disposición adicional sexta da Lei 5/2000, do 28 de decembro, de medidas fiscais e de réxime orzamentario e administrativo, a continuación das xa existentes, as letras j), k), l), e m), co seguinte contido:

"Dous.- As funcións da axencia serán:

j) Xestionar as medidas e actuacións que se lle encomenden no marco da programación dos fondos agrarios de desenvolvemento rural.

k) Xestionar e aplicar as medidas contidas nos programas de desenvolvemento rural sostible, no marco da aplicación da Lei 45/2007, do 13 de decembro, para o desenvolvemento sostible do medio rural, ou norma que a substitúa, sen prexuízo das competencias que nesta materia teñan outros órganos da Administración autonómica.

l) A xestión dos bens e dos dereitos incorporados ao Banco de Terras de Galicia. "

m) A realización da función de servizo de transmisión mediante arrendamento respecto dos predios rústicos procedentes de explotacións nas que cesase anticipadamente a persoa titular, sen seren cedidas a terceiras persoas."

Cuarta.-*Modificación da Lei 6/2007, do 11 de maio, de medidas urxentes en materia de ordenación do territorio e do litoral de Galicia.*

Un.- Engádesse unha letra d) ao artigo 10 da Lei 6/2007, do 11 de maio, de medidas urxentes en materia de ordenación do territorio e do litoral de Galicia, co seguinte contido:

"d) Recompilación e tratamento de información do territorio galego, así como á produción cartográfica para as diferentes consellerías e organismos públicos da Comunidade Autónoma de Galicia, especialmente en materia agraria e de desenvolvemento rural".

Dous.- Modifícase a letra b) do punto 1 do artigo 13 da Lei 6/2007, do 11 de maio, de medidas urxentes en materia de ordenación do territorio e do litoral de Galicia, que queda redactado como segue:

"b) A vicepresidencia, que lle corresponde á persoa titular do centro directivo competente en materia de sostibilidade e paisaxe".

Tres.- Modifícase o parágrafo primeiro do artigo 16 da Lei 6/2007, do 11 de maio, de medidas urxentes en materia de ordenación do territorio e do litoral de Galicia, queda redactado como segue:

"Os postos de traballo do Instituto de Estudos do Territorio serán cubertos por

persoal en réxime de dereito laboral ou por funcionarios da Comunidade Autónoma de Galicia ou doutras administracións públicas de acordo co disposto na Lei de función pública de Galicia”.

Quinta.-*Modificación da lei 4/2006, do 30 de xuño, de transparencia e de boas prácticas na Administración pública galega.*

Modifícase o punto 3 do artigo 11 da Lei 4/2006, de 30 de xuño, de transparencia e boas prácticas na Administración pública galega, que quedará redactado como segue:

“3.- Os convenios de colaboración a celebrar polos suxeitos determinados no artigo 1 apartados a), b) e d) da presente norma necesitarán da autorización previa do Consello da Xunta cando impliquen asunción de obrigas de contido económico por importe superior a 150.000 euros ou cando ditas obrigas, aínda que non superen a citada cifra, teñan carácter plurianual.”

Sexta.-*Desenvolvemento da lei.*

Facúltase a Xunta de Galicia para ditar as disposicións necesarias para o desenvolvemento e a execución de canto se prevé nesta lei.

Sétima.-Entrada en vigor.

Esta lei entrará en vigor o 1 de xaneiro de 2011.